

Pauro Homa ezektsa bo ziwatahaka

Pauro Homa ezektsa bo ziwatahaka asahi Sudeutsabyitsa iwatahi ispe niy:

— Taparaka Deus Abarão ziwatawy itsekokatsa humo kino niwatihi nisiwatawy, iwatsahi ityryktsa niyziknaha. Sudeutsa Abarão tsekokatsa. Tubabatu Deus taharere ty Moises bo nyny niy iwahahi ziwatahaka, iwaze Sudeutsa ana humo hi yhỹ ziknakaranaha. Taparaka Sudeutsa zuba Deus tyryktsa. Aiba eze zuba Deus meky watu niy, Sesus Kiristu iharapatawyhyta humo ni-hyrikosokda, mysapyzeky nihyrikosoda iwatahi Deus mysopyksapybyri humo mymyokzo. Abaka kytsa ihumo sispirikporẽtsaktsa ityryktsa myziknaha. Taparaka Sudeutsa abaka Sudeutsabyitsa kino niwatihi ityryktsa myziknaha — niy. Homa ezektsa ana humo hi batu sihyrinymyry iwaze Deus Pauro ziapewywyky iwatahi ziwatahaka. Abaka katsa kino niwatihi Pauro wataha humo tanymyryky.

Deus wasania ty myzubaha bo my.

¹ O Homa ezektsa ahabo piwatahaka. Utakta Pauro. Sesus Kiristu tsumuẽhĩtsa Deus zikwatawy niy. Ata hi:

— O Pauro ikia apehata tsimy. Wasaniha ty nanabyitaba tynatsasokokta! — niy.

Hỹ iky.

² Tubabatu Deus sohotsa tihi:

— Deus wasania ty mybarawy ezektsa myzubaha bo mysipeha. Asaktsa Deus harere kytsa sizubarētsa bo mykaranaha — nikaranaha. Ana kino botu ziwataha iharere papeu humo ziwataha. Iharere wasani my. Ana ty hi botu ziwataha abaka atsatu wasani mykara, Deus wasania ty motsasokonaha. ³ Deus wasania ty tatse soho. Sesus Kiristu mypehakatsa. Atahi mybarawy bo inasik Dawi tsekokatsa niyzik. Deus tse mywata niyzik. ⁴ Deus hyrikoso ituk mynapykyryk. Atahi mybarawy bo inasikze atakta wasani haty ziknakara. Tsimysapyrēta ziknakara. Nihyrikosokda. Bykyze Deus zikwy humo inahyrizikpo. Ispitu niyzikzo. Ana humo hi kytsa sizubarētsa:

— O atakta Deus tse babata. Iktsazubatahaktsa — niaha. ⁵ Ihumo Deus piksapywyky. Deus hi zikwatawy wasania ty iakzohota kytsa sizubarētsa bo motsasoko ana humo hi zikpeha. Iwatsahi kytsa sizubarētsa Sesus Kiristu harere piwabyky-nahaze hyỹ mykaranaha. Ihumo sispirikporētsa moziknaha hỹ. ⁶ Ikiahatsa Homa ezektsa kino niwatihi Deus tyryktsa tsimoziknaha. Ana kino Deus mozihikik.

⁷ Iwaze ahabo piwatahaka, ikiahatsa Homa ezektsa. Deus ahahumo tsimypokzitsiarēta hỹ, ityryktsa tsimoziknaha anahi nizihikik. Deus myzo. Sesus Kiristu mypehakatsa. Utakta ahatsy-hyryze ispe my:

— O Deus myzo Homa ezektsa tysisapywykykta! Sesus Kiristu humo sakurētsa babatsa moziknaha hỹ — my. Iwa myhỹ.

Pauro Sesus Kiristu humo ka tsakurêta iwaze Deus bo Homa ezeiksa tsyhyryze mopamykysoko.

⁸ Iwaze myzubarêtsa ahasoho humo tihi:

— O Homa ezeiksa Sesus harere bo hyÿ — mykaranaha. Ana humo hi piwabykyze kakurêta hÿ. Deus pe my:

— O Deus myzo ikia zuba tsamysapyrêta ikia Homa ezeiksa botu tsiksitsumuêhî iwatsahi ahumo sispirikporêtsa moziknaha — my. Iwa Deus pe my. ⁹ Pibytuhukutu ahasoho bo mytsaty mykara. Ahatsyhyryze Deus bo mopamykysoikik. Deus zikwatawy iwatahi itsyhyryze tarabaja mykara. Nanabyitaba Deus wasania ty tatse soho motsasoko ana hi kahyriziktsokzawy. Uta ahahumo kamypokzitsiarêta iwatahi Deus bo mopamykysokoze hi:

¹⁰ — O myzo Homa ezeiksa bo mynakozore zeka kakurêta mykara. Tshipikpeha zeka sibo mynakozore! — my. ¹¹ Ikiahatsa humo kahyrizikbarêta. Ahabo mynakozore tsihikik. Hawa Deus zikyrinymyryky atsa tu pahahyrinymyry tsihikik iwaze Sesus harere bo hyÿ tsimykaranaha hÿ. ¹² Iwa uta hi pahakuwyky. Ikiahatsa kino niwatihi tshipikykuwykynaha. Katsaktsa Sesus harere bo hyÿ tsimykaranahaze tsimyhara-pekuykynahaktsa.

¹³ O katukytsa ahabo mynakozore tsihikikze batu zik, tsihokdaharêna iwatahi batu pão. Kytsa Sesus harere bo hyÿ mykaranaha ana humo hi mozihihikik. Ahatukytsa Sesus humo sispirikporêtsa ana hi mozihihikik iwatahi ahabo mynakozore tsihikik hÿ. Utsa kytsa Sudeutsabyitsa Sesus humo sispirikporêtsa ikiahatsa tuk Sesus harere

bo hyĩ mykaranaha asa watsa hi mozihihikik.
¹⁴ Deus myzubaha bo zikpeha. Iwaze bipyritsa bo mykara. Bipyritsabyitsa bo kino niwatihi. Utsa papeu humo sihyrinymyrẽtsa bo mykara. Asaktsa papeu humo sinyhy byitsa bo mykara. Myzubaha bo mykara, sibo Deus wasania ty motsasokoro Deus zikyko tahi mykara. ¹⁵ Iwatahi Homa bo pomo tsihikikze tu, ahabo Deus harere motsaso tsihikik hyĩ.

Deus wasaniha humo mekywa tu tsimoziknaha.

¹⁶ Aty zeka Deus harere bo hyĩ mykara atakta Deus zikwy humo ityryk mozik Deus tuk mozuruku. Tapara Sudeutsa Sesus harere bo hyĩ nikaranahaze ityryktsa niyziknaha. Kyze Sudeutsabyitsa Sesus humo sispirikporẽtsaze ityryktsa niyziknaha. Ana humo hi kakurẽta. Iharere humo batu kasikpyby. ¹⁷ Deus wasania ty tsihiwabyinahaze isoho humo myhyrinymyrẽtsa. Hawa kytsa simysapyrẽtsa moziknaha ihumo tsipinymyrykynaha. Deus hi:

— Asa zuba Sesus harere bo hyĩ mykaranaha asahi kaokzeka wasani mykaranaha. Pibyi-tuhukutu Sesus harere bo ma mykaranaha — my. Deus harere papeu hi:

— Aty zeka Deus humo tsimysapyrẽta mozik iwatahi pibiyituhukutu Sesus harere bo hyĩ mykara — niy.

Kytsa sisopyksapybyitsa tu nikaranaha ana humo hi Deus taokaniki.

¹⁸ Deus ta bijoikpe eze tu my. Kytsa sisopyksapybyitsa tu nikaranaha humo Deus taokaniki. Atahi:

— Kaokzeka ikiahatsa batu ahasopyksapy — my. Kytsa Deus harere humo batu hỹ zikaha, ustsya kytsa mysisapybyikinaha. Kytsa Deus wasania ty motsasokonahaze ustsya kytsa mysiaknikinaha, kytsa Sesus bo hyỹ mykaranaha ihumo sispirikporẽtsa moziknaha ana humo kino batu hỹ mykaranaha. Iwatsahi Deus okzeka batu sisopyksapy maha. ¹⁹ Hawa Deus mykara anatyhi mybarawy ezektsa bo botu nisihyrinymyry. Iwaze hawa Deus mykara kytsa mysihyrinymyrykynaha tsahi batu hỹ zikaha. Iwatsahi ihumo batu siakparawy. Iwatahi Deus mysisininiwyky.

²⁰ Katsa Deus ba zinyana. Deus koikny bakta tu mybarawy nizukni. Nizukni naha bo iktsa tsimahaze. Katsa hi:

— O mybarawy suknitsa zikwykyta my. Atahi Deus babata — tsimykarana. Ustsya kytsa hawa Deus soho mytsaty mykaranaha batu taharere ty harapubeteheke nikaranaha. Ba ziktsaso:

— Hawa Deus mykara myhumo tsihokdahařẽna — maha. Iwaha hi ba ziktsaso. ²¹ Hawa Deus mykara sihyrinymyryẽtsa. Iwatsatu batu ipe niaha:

— O ikia zuba wasani tsimykara. Ikia zuba tsamysapyrẽta — maha. Iwaha hi ba ziktsaso. Paikpa mytsaty nikaranaha. Simytsatyhybyitsa tu kytsa watsa asahi miwaha buruk nizarana.

²² Tahapetu sisopyk:

— O katsaktsa myhyrinymyryẽtsa — mytsaty ahabyitsa tu nikaranaha. Deus okzeka batu aty tohi sinymyryhy. ²³ Deus zuba koikny baktatu my. Asaktsa Deus bo ba zinyana iwatsahi iharere bo batu yhỹ nikaranaha. Ihumo batu simyharerewaby batu iktsazuba zikaha. Iwaze asahi:

— Katsaktsa kytsa hyrikoso watsa tahasukniki-naha! Sirarakatsa hyrikoso tsawatsa nisisukniki-naha. Sisarakatsa hyrikoso tsawatsa nisisukniki-naha! Pyryhyktsa hyrikoso tsawatsa nisisukniki-naha. Deus myhyrikoso hyrity wa ta bo zuba — mytsaty nikaranaha. Asa kino siharerewabymy-barētsa iksazuba sisopyk.

²⁴ Asaktsa sakmyirētsa watsa nikaranaha iwaze simysapybyitsa zuba mozihihiknaha atsatu mynakaranaha. Iwatahi Deus nisierekek hawa mozihihiknaha astsa tu mykaranaha. Tyhapemyijaikiknaha, tyharapesapybyikiknaha.

²⁵ Asaktsa Deus harere bo batu yhỹ zikaha. Wasaniha humo ka batu hỹ zikaha. Hawa ha ty batu mysapy ana humo ka hyỹ mykaranaha batu sispirikpo. Myspihikbatawy bo zuba yhỹ mykaranaha. Deus nizukni naha humo siakparawy nikaranaha. Deus babata batu siakparawy nikaranaha. Batu sispirikpo, ata bo hi katsa siakparawy tsimaha iharere bo ma tsimahaktsa! Iwa tsimaha. Ata hi tawahi mynapykyk iwatsahi katsa hi:

— O ikia zuba tsapunihikrēta. Ikia tsamys-apyrēta — tsimaha. Iwa tsimaha hỹ.

²⁶ Iwatsahi asaktsa Deus humo simyharerewabybyitsa tu Deus nisierekek. Zimyi tsihihiknaha atsatu mykaranaha. Iwa Deus kytsa nisierekek. Wytykyryk tahabariktsa tuk batu hỹ zikaha asiza zuba tahawaky wytykyryk humo zuba ziknakaranaha. ²⁷ Kytsa kino niwatihi wytykyryk waza tahaokeza ba ziksipyryriryknaha. Tahawakysa humo zuba mozihihiknaha ana humo hi batu sisopyksapy my. Ziknaharape

wowokonaha sisapybyitsa tu nikaranaha ana humo hi siakmyitsa niyziknaha. Deus hi nisisininiwyky, iharere bo zimyiwykynaha.

²⁸ Hawa ha ty Deus soho wasaniha bo h̃byri nikaranaha, iwatsahi simysapybyitsa soho bo zuba mytsaty ziknakaranaha. Iwaze Deus nisierekek iwaze hawa nizihikiknaha atsatu mynakaranaha.

²⁹ Iwatsahi wasanibyitsa mozurukunaha. Piyyituhukutu sisopyk-sapybyitsa mykaranaha. Utsa kytsa namy zuba mozhikiknaha. Taha bo zuba mytsaty sisopyk. Okyrysaro tsihitsa moziknaha. Myzokdiwy mynakaranaha. Mysukyrywy. Simyspihikbatakatsa. Sisakimiyjanikitsa.

³⁰ Siharerewabymybarẽtsa. Deus humo tahakyrikinaha. Siharereziubyikitsa. Asahi:

— Katsa zuba myhyrinymyrẽtsa nikaranaha. Katsakta mymysapyrẽtsa — mytsaty ahabyitsa nikaranaha. Piyyituhukunaha tu tahapetu sisopyk:

— Hawa ha sa batu imysapy tsimaha — iwa mytsaty mynakaranaha. Tahazotsa harere bo batu yh̃ zikaha. ³¹ Wasaniha baba humo batu sihyrinymyry tsihikbyitsa. Motsasokonahaze batu wasani zikaha. Utsa kytsa ty batu isty tsumuẽh̃ nymyryh̃. Batu aty tohi humo ba zipokzitsi.

³² Deus hi:

— Asakta simysapybyitsa tu mynakaranaha sinini ykarawy bo mysipeha. Anaeze tahawahi mynapykyryknaha — my. Ana harere humo sihyrinymyrẽtsa. Iwatsa tu batu ma zikaha. Utsa kytsa mysimyiwykynahaze sihumo tahaydikiknaha. Iwa my.

2

Deus myzubarētsa huak ty sibo nyny my.

¹ Kaharereziuwytša ikiahatsa ja. Sozeka ja ahatuk tsimypamykysonaha.

— Asaktsa Deus okzeka batu sisopyksapy mykaranaha. Katsaktsa batu siwatsa

— tsimykaranaha. Ikiahatsa siwatsa hi tsimykaranaha iwaze ahaharere ty harapubeteheke tsimykaranaha. ² Deus zuba wasani haty mynakara. Deus tihi:

— Aty imysapybara ty mykara zeka atakta sinini ykarawy bo pipehahik — my. Anaharere wasani my. ³ O kaharereziuwytša. Ahape tu ahasopyk zeka:

— Deus ustsā simysapybyikitsa tu nikaranaha humo mysininiwyky. Katsaktsa batu — mytsaty ahabyitsa tsikykaranaha. Ikiahatsa kino atsatu tsimykaranaha. Ikiahatsa Deus harere humo ka ba zikwaknaha iwaze sinini tsimykaranaha!

⁴ Ikiahatsa Deus humo tsimysapybyrikinaha. Deus ahahumo tsiakubyrisorokrēta. Ahahumo tsimypokzitsiukrēta. Pahasapywyky.

Ahamysapybara ty tsimoewynaha iwa mozihihik. Ahamysapybara ty tymoewy ahabyizeka pahasininiwyky. Ikiahatsa hi:

— O mysapybyitsa tu tsimykaranaha Deus mybo ba zikmysininiwy — mybarapetu tsimykaranaha. ⁵ Iwatahi sihumo Deus taokaniki. Asaktsa simysapybyitsa tu mynakaranaha mysininiwyky. Hanawa puruze Deus simysapybyikitsa sinini ykarawy bo mysipehahik. Wasani my simysapybyitsa tu nikaranaha.

Ikiahatsa ahamysapybyitsa tu tsikykaranaha batu tymoewy. Tahatsiktu nikaranaha iwatsahi pahasininiwyky hỹ.

⁶ Bykyze Deus kytsa atsehezubaha bo ihuak ty sibo nyny my. Hawa mozurukunahaze ihuak ty sibo nyny my. ⁷ Wastuhu mybarawy ezektsa usts kytza nisisapywykynaha. Iwa Deus sisoho wasani haty motsasoko anahi mozihihikiknaha. Tahawahi Deus tuk mynapykyryk tsihihikiknaha ana hi tapyryky. Deus harere bo zuba hyỹ mozihihikiknaha iwaze Deus tyryktsa moziknaha. Myhyrikosok-danahaze Deus tuk tahawahi mynapykyryknaha hỹ. ⁸ Ustsaktsa batu. Deus harere bo batu yhy ziknakaranaha. Sisopyksapybyitsa tu nikaranaha Deus taokaniki iwatahi ihuak ty sibo nyny my ana hi wasani my.

⁹ Deus mysininiwyky mysimyitsapyriwyky. Sudeutsa, Sudeutsabyitsa bo kino niwatihi kytsa sizubarẽtsa asaktsa pimyikinaha simysapybyitsa tu nikaranaha humo ihuak ty sibo nyny my, ana hi wasani my. ¹⁰ Asaktsa usts kytza bo mysisapywykynaha ihuak ty sibo nyny my. Sudeutsa Sudeutsabyitsa bo kino niwatihi myzubaha bo my. Simysapyrẽtsa tu Deus mysisoziuku. Simyharerewabynikitsa moziknaha. Ba paikpa mytsaty zikaha ihumo sakurẽtsa moziknaha Sudeutsa, Sudeutsabyitsa bo kino niwatihi mykara. ¹¹ Deus okzeka atsezubaha nimysukni, myzubaha humo tsimpokzitsiukrẽta iwaze Sudeutsa, Sudeutsabyitsa humo kino niwatihi ihuak ty Deus sibo nyny myze wasani.

¹² Sudeutsabyitsa Moises sopykwy ty humo batu

sihyrinymyry. Iwatsahi Deus harere Moises ziwatahakanaha batu tyny. Iwatsa tu mysapybyitsa tu nikaranahaze Deus sinini ykarawy bo mysipehahik. Batu ispe my:

— Moises sopykwy humo ka batu yhỹ tsimykaranaha — my. Iwa batu tyso. Moises sopykwy humo ka batu tyny. Sudeutsa zuba Moises sopykwy humo sihyrinymyr̃etsa. Iwatsa tuze simysapybyitsa tu nikaranaha Deus sinini ykarawy bo mysipehahik. Ispe my:

— Ikiahatsa kaharere bo batu yhỹ tsikaha. Kaharere Moises ziwatahakanaha batu yhỹ zikaha — my.

¹³ Asaktsa Moises sopykwy humo hỹ mykaranahaze wasanihatsa mykaranaha. Deus ispe my:

— O ikiahatsaktsa ahamysapyr̃etsa — my. Asaktsa Moises sopykwy humo waby zuba sisopyk, iwaze ana harere bo batu h̃ mykaranaha Deus okzeka batu simysapy iwatahi ba ziksibetesaka.

¹⁴ Sudeutsabyitsa batu Moises sopykwy sinyhy. Iwatsatu wastuhu kytsa sinyhybyitsa tu ana papeu humo hi hỹ mykaranaha kytsa watsa asahi papeu humo sihyrinymyr̃etsa. Nawa ha ty wasanikia ty Sudeutsabyitsa sihyrinymyr̃etsa.

¹⁵ Hawa mozurukunaha, usts a kytsa sibo iktsa mykaranahaze asahi:

— Asaktsa batu Moises sopykwy. Sinyhybyitsa tu iwatsa tu wasani sihyrinymyr̃etsa. Hawa imysapybara ty sihyrinymyr̃etsa — maha. Iwa h̃. Tahapetu sisopyk:

— Ana hi wasani. Ana hi batu mysapy — maha. Sispirikporëtsa maha. Iwa ustsä kytsa sisoho mytsaty mynakaranaha.

¹⁶ Bykyzehu ana humo kino nawa my. Hawa kytsa mozurukunaha Sesus Kiristu sihuak ty sibo nyny my. Deus wasania ty motsasokoro anahumo kino hyÿ mykara. Hawa mytsaty tsimykaranaha ustsä kytsa batu sihyrinymyry, Deus zuba mysoho humo tsihyrinymyrëta iwatahi ihuak ty mybo nyny my.

Sudeutsa Deus harere ibyky Moises ziwataha ana bo batu hÿ nikaranaha.

¹⁷ Ikiahatsa ja:

— O katsaktsa Sudeutsa tsimaha. Deus harere ibyky Moises ziwataha ana bo hyÿ tsimykaranaha ana humo hi mysapyrëtsa. Deus taparaktsa humo nisiwatawy iwatsahi ityryktsa tsimoziknaha — tsimykaranaha. Iwa tsinapamykysokonaha. ¹⁸ Katsa hi:

— Hawa Deus mozihihik myhyrinymyrëtsa. Moises harere humo wasani haty tsinymyrykynaha imysapybara tyka kino niwatihi tsinymyrykynaha Moises sopykwy humo ka myhyrinymyrëtsa, tsinymyrykynaha — tsimaha.

¹⁹ Ustsä kytsa Moises sopykwy humo batu sihyrinymyry. Iwaze ikiahatsa hi:

— Katsa zuba iharere humo myhyrinymyrëtsa. Katsaktsa ustsä kytsa tahahyrynymyry tsihikik. Asahi sihyrizikubyitsa watsa, iwatsahi mysitsumuëhînahä. Katsaktsa rika watsa myhyrinymyrëtsa tu ustsä kytsa bo wasania ty sibo tsimytsasokonaha. Katsa kytsa mysihyrinymyrynahaze sispirikporëtsa moziknaha iwatsahi

rika watsa tsimaha. ²⁰ Sihyrinymyrybyitsaktsa tahahyrinymyrykynaha. Asahi tsikaeni zuba sihyrinymyrëtsa. Katsaktsa Moises sopykwy humo tsinymyrybanaha iwatsahi sispirikpobyitsa bo tahahyrinymyrykynaha — tsimykaranaha. ²¹ Utsa kytsa bo ahaspirikpowy tsimysihyrinymyryikiknaha. Ahape tu batu ahasopyk. Ahaspirikpowy humo batu hỹ tsimykaranaha. Ikiahatsa hi:

— Utsa namy humo ba zikmytsyhyryboanaha — tsikykaraha. Ikiahatsa ja. Utsa namy humo tsikahatsyhyryboakanaha.

²² — Utsa okeza ba ziksihuahuanaha — tsikykaranaha. Ikiahatsa ja. Utsa okeza tsimysihuahuanaha.

— Deustsabyitsa bo ka ahanamy ty batu nyny zikaha! — tsikykaranaha. Ikiahatsa ja. Deustsabyitsa wahoro bo tsimypupunaha iwatsahi sinamy ty tsikahatsyhyryboakanaha. Iwa tsimykaranaha ahamysapybyitsa siwatsa tsimykaranaha. Asaktsa batu imysapy maha ikiahatsa kino niwatihi batu ahamysapy tsimaha ²³ Kytsa sizubarëtsa pe tsimaha:

— Katsaktsa Moises spirikpowy humo tsinymyrybanaha — tsimaha. Ana harere ty batu hỹ tsimykaranaha, iwatsahi Sudeustsabyitsa ahahumo Deus harere bo batu ma zikaha. ²⁴ Iwaze Deus harere papeu humo botu ziwataha:

— Sudeustsabyitsa Sudeutsa humo, Deus soho pisapybyikinaha Sudeutsa nisimyinahatsa iwatsahi Sudeustsabyitsa Deus soho pisapybyikinaha — niy.

²⁵ Katsaktsa Sudeutsa mypiak humo tsizyzykyknaha. Wasani tsimaha. Tubabatu Moises tihi:

— Ahapiak tyzyzyknaha anahi awatawy Deus hyrytsa tsimaha — niy. Iwaze mypiak tsizyzyknaha Moises mype niwatihi hawa tsimyzurukunaha, ana ty hi mymyhyrinymyryky.

— Ikiahatsa Moises spirikpowy tsizubarēna bo yh̃y ahabyi zeka iwaze ahahyrytsa ty zyzykbyitaha mahani iwatawywy. Ikiahatsa Sudeutsabyitsa watsa, asahi Moises spirikpowy batu ahawabyhy asahi Deus harere humo batu sihyrinymyry. ²⁶ Sudeutsabyitsaktsa batu sipiak zyzykyhyk. Iwatsatu pisapywykynaha iwa Moises spirikpowy humo mykaranaha zeka Sudeutsa watsa moziknaha. Deus okzeka ihyrytsa moziknaha, iharere bo hỹy mykaranaha humo. Sipiakzyzykykbyitsa kino Deus okzeka ihyrytsa moziknaha.

²⁷ “Katsaktsa Sudeutsa tsimaha mypiak tsizyzyknaha Moises spirikpowy humo myhyrinymyrētsa. Iwatsahi nawa tsimyzurukunaha zetu tsinymyrykynaha.” Iwa batu tsimykarana Deus harere bo batu h̃y tsimykarana. Sudeutsabyitsa sipiakzyzykykbyitsa. Moises spirikpowy humo batu sihyrinymyry. Wastuhu wasani mozurukunaha ana harere bo hỹy mykaranaha iwaze Deus okzeka simysapyrētsa moziknaha. Sihyrinymyrybyitsa tuze iharere humo wasani mykaranaha. Ikiahatsa Sudeutsa tsimaha iharere bo batu h̃y tsimykarana iwatsahi Deus okzeka batu ahasapy tsimaha.

²⁸ Katsaktsa tsipisapykynaha Deus harere bo hỹy tsimykarana zeka ihyrytsa tsimoziknaha.

Katsaktsa mypepetu mysopyk zeka:

— O katsaktsa Deus tyryktsa iwatsahi myhyrytsa piak tsizyzyknaha. Moises spirikpowy humo myhyrinymyrëtsa iwa Deus hyrytsa tsimaha — mybarapetu mysopyk. Ikiahatsa iharere bo hyÿ zikahabyitsa tu iwatahi Deus batu tyso:

— Ikiahatsa kahyrytsa tsimaha — iwa batu tyso.

²⁹ Uta ahape:

— Aty sa Sudeu babata my. Aty sa Deus hyrytsa maha. Atahi Deus harere bo hyÿ mykara, atakta Deus harere mozihikik — my. Deus hyrikoso ituk mynapykyryk. Wastuhu sipiakzyzykykbyitsa Deus harere bo hyÿ mykaranaha. Iwaze Deus ispe my:

— O ikiahatsa ahamysapyrëtsa — my. Kytsa sisoho humo batu siharereziu Deus zuba sisoho mysiharereziuku. Kytsa sizubarëtsa Sudeutsa, Sudeutsabyitsa kino niwatihi Deus harere bo hyÿ mykaranaha zeka, asaktsa Deus hyrytsa babatsa moziknaha hÿ.

3

¹ Kytsa sizubarëtsa Deus harere bo hyÿ mykaranahaze Deus hyrytsa moziknaha. Iwahatu wastuhu ahatukze tihi:

— Amy skaraba Sudeutsa tsimaha. Amy skaraba myhyrytsa piak tsiksizyzyknaha. Tymytsumuëhĩnaha ja — tsimaha. Iwa batu tyso. ² Uta tihi:

— Pahatsumuëhĩnaha hÿ. — Mydiritsa zizyzyknaha humo Deus hyrytsa ziwatahawy iwaze Deus Moises bo nitsasoko, atahi taparaktsa mydiritsa bo nitsasoko. Ata humo hi Moises spirikpowy

ziwataha. Iharere Sudeutsa taparaktsa bo zuba nitsasoko aiba zuba ustsya kytsa iharere piwaby-naha. ³ Sozeka ja ikiahatsa kape:

— Mydiritsa Moises harere bo yhy nikaranaha. Wastuhutsa taparaktsa mydiritsa Deus harere bo batu hy nikaranaha. Iwa zeka Deus harere sibo batu hy my — tsimaha. Batu ba Deus wasani mynakara. ⁴ Hawa ha ty Deus motsasoko at-satu isopyk. Deus ba zikmyspihikbata. Kytsa sizubaretsa mospihikbatakanaha zeka Deus batu. Deus harere papeu humo botu ziwataha:

— Tsimytsasokoze kytsa sizubaretsa tihi “O Deus aharere wasani my” maha.

Asahi tihi zeka iharere batu isapy maha asahi zimyikinaha siharere batu wasani my

Deus zuba wasani

Deus papeu niy.

⁵ Tozeka ja wastuhutsa kytsa motsasokonaha:

— Katsaktsa wasanihabyitsa tu tsimykaranaha zeka kyze kytsa mybo iktsa maha zeka “O Deus zuba pisapyky” mykaranaha, iwatsahi mysapy-byitsa tu tsimykaranaha Deus soho kytsa mysi-hyrinymyrykynaha — maha. Asahi:

— Mysapybyitsa tu tsimykaranaha zeka Deus zuba tsimysapyrêta kytsa mysihyrinymyry. Iwatahi Deus ihuak ty mysapybara ty humo batu nyny ziky batu wasani ziky — maha. Mybarawy ezektsa watsa mytsaty mykaranaha asahi iwa mopamykysonaha. ⁶ Niwazuba! Deus siwa batu mytsaty ziky myhumo wasani isopyk. Atahi tisopyksapyrêta mybarawy ezektsa mywatu ihuak ty mybo nyny my. Hawa mozurukunaha humo ihuak ty nyny my. Wasani byitatu zeka ana

kino batu ziky, atahi imysapyrēnikita tu iwatahi mybarawy ezektsa bo ihuak ty nyny my.

⁷Tozeka ja kape tsimaha:

— O utakta wasani ahabyizeka asaktsa kabo iktsa mahaze tihi: “O Deus zuba wasani mykara” maha. Kamysapy byizeka kytsa tihi: “O Deus ikia zuba amysapyrēnikita” maha. Iwatahi kytsa Deus soho kahumo sihyrinyrētsa. Deus sinini ykarawy bo pikpeha zeka batu isopyksapy kaokzeka batu wasani — my. Iwa batu tyso. ⁸Ana humo kino wasape tsimaha zeka ikiahatsa tihi:

— O mysapybyitsa tu tsimykaranahaktsa kytsa! Iwa kytsa sizubarētsa Deus harere bo hỹ mykaranaha, atahi imysapyrēnikita maha — tsimaha. Batu ba. Ana harere hi asaktsa kytsa kahumo batu siakparawy motsasokonaha. Iwa piksohometukunaha — ana soho hi Pauro motsasokoro — mybarapetu mykaranaha. Asaktsa Deus mysisininiwyky. Atahi ispe my:

— Ikiahatsa batu ahamysapy — my.

Batu aty tohi Deus okzeka tisopyksapyrēta.

⁹Kyze wastuhutsa tihi:

— O katsaktsa Sudeutsa wasani tsimaha Deus harere mybo nitsaso. Sudeutsabyitsa batu, Deus sibo ba ziktsaso. Iwa Deus okzeka batu sapy maha — mykaranaha. Katsaktsa Sudeutsabyitsa watsa myzubarētsa. Tsimysapybyi tsihikiknaha mysapybyitsatu tsimykaranaha batu tymoewy. Iwa botu iky. ¹⁰Deus harere botu papeu humo ziwatahaka:

— Mybarawy ezektsa batu wasani zikaha. Batu aty tohi isopyksapy.

Kytsa sizubarētsa batu wasani zikaha.

- 11 Wasaniha humo batu sispirikpo,
batu aty tohi tawahi Deus tuk mopykyryk
tsihikik
- 12 Kytsa sizubarētsa Deus soho bo batu mytsaty
mykaranaha.
Imysapybara zuba mozhikiknaha.
Batu aty tohi tsimysapyrēta. Suknihabyitsa.
- 13 Siharere batu imysapy. Siharerewabymy-
barētsa.
Pibyituhukunaha tu mybarapetu
mynakaranaha mysispihikbataikiknaha
zuba.
- 14 Sisakparēnikitsa tu ustsā kytsa mysimyiiaikik-
naha iwa motsasokonaha.
- 15 Mysisukyrykynaha.
- 16 Ustsā kytsa namysapybyrikinaha nasimyt-
sapyriwykynaha.
Kytsa mysitsapyriwykynaha.
- 17 Siakubyitsa tu ustsā kytsa mysiaknikinaha.
- 18 Deus humo batu simyharerewaby. Ihumo batu
siakparawy.
Iwa maha — niy. Iwa Deus harere papeu humo
mysoho nitsasoko.
- 19 Iwa Moises spirikpowy ziwatahaka.
Ana papeu humo Sudeutsa Deus soho ty
nisihyrinymyryky. Iwaze Sudeutsa batu tyso:
— Katsaktsa Moises spirikpowy humo yhy tsi-
nakaranaha — maha. Ana harere tyhi batu hyhy
zikaha. Sudeutsabyitsa niwatihi iharere bo batu
hyhy zikaha. Iwatsahi myzubaha tahaharere ty
harapubeteke ba zikaha. Sudeutsa Sudeutsaby-
itsa kino niwatihi tahaharere ty harapubeteke ba
zikaha. 20 Iwatatu Deus batu ziky:

— O ikia Moises harere bo yhỹ tsimy iwatahi tsamysapyrêta tsimozik — Iwa ba ziktsaso ba ziky. Atahi:

— Moises sopykwy tsipihyrinymyryky zeka amysapybyitsa tu tsimykara tsmoewy iwatahi kahumo aspirikporêta tsimozik — niy.

Hawa Deus okzeka mymysapyrêtsa tsimozik-naha.

²¹ Aba zuba hawa Deus humo mybarawy eze-
tsa simysapyrêtsa moziknaha nitsasoko. Deus hi:

— Ikiahatsa ahamysapyrêtsa tsimoziknaha. Batu Moises sopykwy humo ahamysapyrêtsa tsimoziknaha ba zikaha — niy. Ana kino botu Moises nisihyrinymyry. Tubabatu Deus sohokotsa kino niwatihi atsatu nisihyrinymyryky.

²² Deus hi:

— Asa zuba Sesus Kiristu harere bo hỹ mykaranaha asahi kaokzeka simysapyrêtsa moziknaha. Sudeutsa, Sudeutsabyitsa kino niwatihi Sesus harere bo hỹ mykaranaha zeka kaokzeka simysapyrêtsa moziknaha — my.

²³ Batu aty tohi imysapyrênikita Deus wata my. Astsabanitsa mysapybyitsa tsimynakaranaha. Batu aty tohi Deus wata my. ²⁴ Deus mymysapywyky. Mymysapybyitsa tu tsikykaranaha ana humo hi Sesus Kiristu nihyrikosokda atahi mysapyzeky ziaксе iwatsahi mysapybyitsa tsikykaranaha ana humo hi batu sinini tsimaha. Sesus Kiristu mysapyzeky nihyrikosokda iwatahi Deus mype wasani tsimaha. Deus hi:

— Ikiahatsa Sesus Kiristu harere bo hỹ tsimykaranaha iwatsahi ahamysapyrêtsa

tsimoziknaha — my. Iwa mymysapywyky atahi myhumo tsimypokzitsiarêta.

²⁵ Deus hi Sesus Kiristu mybarawy bo zipeha. Mybarawy bo inasikze mybarawy ezeiksa sapyzeyki nihyrikosokda ana bo izumuze. Kytsa huak ty simysapybyitsa tu nikaranaha ana humo hi nihyrikosokda. Iwaze katsakta Sesus Kiristu harere bo hyŷ tsimykaranaha mysapybyitsa tu tsikykaranaha Deus nimyokzohik hŷ. Sesus Kiristu nihyrikosokdaze iwa kytsa simysapyrêtsa moziknaha, iwa Deus kytsa nisihyrinymyryky. Tubabatu Deus tsiakubyrisorokrêta tu simysapybyitsa tu nikaranaha sinini ykarawy bo ba ziksipeha. Tapetu isopyk:

— Bykyze katse babata sisapyzeyki mohyrikosokda iwaze asakta kaharere bo hyŷ mykaranaha sinini ykarawy bo ba mysipeha — my. ²⁶ Abaka meky watu kytsa simysapybyitsa tu nikaranaha ana soho mytsaty mykara. Kytsa sizubarêtsa bo simysapybyitsa tu nikaranaha humo ihuak ty sibo nyny my. Asakta Sesus harere bo hyŷ mykaranaha simysapybyitsa tu nikaranaha batu mytsatyzo ziky.

— Ikiahatsa kaokzeka ahamysapyrêtsa tsimoziknaha katse babata ahasapyzeyki nihyrikosokda iwatahi pahaokzohik — my. Iwa sispirikporêtsa mykaranaha.

²⁷ Iwatsahi — katsakta wasani tsimaha — ba ziktsasonaha. Mysoho ba ziktsasoziukunaha batu aty tohi tsimysapyrêta my. Deus okzeka Moises sopykwy humo yhŷ tsimykaranaha iwaze — mymysapyrêtsa tsimaha — batu zikaha. Katsakta Sesus humo zuba mymysapyrêtsa tsimaha. Ata

humo hi myspirikporëtsa tsimoziknahaze Deus mysoho tihi:

— Asaktsa katse humo zuba simysapyrëtsa moziknaha — my. ²⁸ Katsaktsa Sesus harere bo hyÿ tsimykaranahaze Deus okzeka mysapyrëtsa tsimoziknaha. Katsaktsa Moises sopykwy bo yhyÿ tsimykaranaha zeka Deus okzeka batu mysapy tsimaha. Iwa hyÿ. ²⁹ Deus Sudeutsa zuba ja iakparawy. Tozeka ja asa zuba mysisapywyky iwaze simysapyrëtsa moziknaha. Batu ba. Deus kytsa sizubarëtsa mywatuze Sudeutsa Sudeutsabyitsa bo kino niwatihi mysisapywyky, sizubarëtsa Sesus harere bo hyÿ mykaranaha zeka simysapyrëtsa moziknaha. ³⁰ Deus kytsa sizubarëtsa bo mysisapywy tsihikik. Sudeutsa Sesus harere bo hyÿ mykaranahaze iwatsahi simysapyrëtsa moziknaha. Sudeutsabyitsa kino Sesus harere bo hyÿ mykaranahaze iwatsahi simysapyrëtsa moziknaha. Mekywatu moziknaha. ³¹ Wastuhu kytsa ahatukze:

— Katsaktsa Moises sopykwy “O iharere mybo batu imysapy” tsimaha — iwa batu tyso, Sesus harere bo hyÿ tsimykaranahaze Moises sopykwy humo niwatihi tsimyziwabykynaha.

4

Hawa Abarão nikara.

¹ Kyze Abarão soho bo mytsaty tsimaha. Atahi taparakta mydiri. Katsaktsa tsekokatsa tsimaha. Deus okezeka tsimysapyrëta niyzik ana hi mot-sasoko. ² Deus Abarão pe niy:

— Ikia tsimysapyrëta — niy. Atahi zisapywyky ja iwatahi Deus ipe niy:

— Ikia tsamysapyrêta — niy. Batu ba. Nawa ha ty wasani nikara batu ana humo hi nitsasoko. Iwaze Abarão tapetu isopyk batu tyso:

— Utakta kamysapyrêta — my. Batu ziky.
³ Hawa Deus okzeka tsimysapyrêta niyzik ana ka motsasoko. Atahi Deus harere bo hyĩ ziknakara iwatahi Deus okzeka tsimysapyrêta niyzik. Iwa Deus harere papeu humo botu isoho mybo ziwatahaka.

⁴ Aty ipehatsa humo tarabaja mykara zeka ana humo hi ihuak ty okyrysarowaka ty nyny niy. Itarabaja humo zuba okyrysarowaka ty nyny niy. Wasani my. Deus iwa batu isopyk mykara.

⁵ Atahi myhumo iakparawy iwatahi iharere bo hyĩ tsimykaranaha zeka mymysapywyky. Asak-tsa pisapywykynahaze ana humo hi batu sisoho:

— Ikiahatsa ahamysapyrêtsa — iwa batu tyso. Batu ba. Asa zuba Sesus Kiristu harere bo hyĩ mykaranaha. Iwaze ispe my:

— Ikiahatsa Deus harere bo hyĩ tsimykarana-haze ana humo hi ahaspirikporêtsa tsimozik-naha iwatahi aha pe “tsahamysapyrêtsa” — my. Tapara simysapybyitsa tu nikaranaha iwatsatu Deus harere bo hyĩ mykaranaha tsahi Deus okzeka simysapyrêtsa moziknaha.

⁶ Aty zeka Deus okzeka tsimysapyrêta, atakta tsakurêta hỹ. Ba zikmysapybyi iwatahi ja tsakurêta mopykyryk mytsaty ahabyita tsimykaranaha. Sesus harere bo hi hyĩ nikaraze tu iwatahi Deus ipe niy:

— Ikia tsamysapyrêta — nikara, ana harere humo hi tsakurêta niapykyryk. Taparakta mydiri Dawi atsatu nitsasoko:

⁷ — Asaktsa Deus harere ibyky Moises ziwataha ana humo batu hỹ nikaranaha batu zikaha. Asaktsa sisopyksapybyitsa tu nikaranaha Deus Sesus humo zuba nisiokzohik iwatsahi sakurẽtsa.

Simysapybyitsa nikaranahaze ana hi Deus nispiriktsokda tawata iwatsahi sakurẽtsa.

⁸ Deus humo simysapybyitsa tu nikaranaha batu mytsaty ziky iwatsahi sakurẽtsa.

Iwa Dawi taparakta mydiri botu nitsaso — Dawi niy.

⁹ Paze ja asaktsa tahapiak zizyzyknaha asa zuba sakurẽtsa. Batu ba. Kytsa kino niwatihi sipiakzykyhybyitsa sakurẽtsa niyziknaha. Iwaze Abarão soho bo mytsatyzo tsimahaktsa. Deus harere papeu humo isoho ziwatahaka:

— O Abarão Deus harere bo hyỹ ziknakara iwatahi Deus ipe niy: “Ikia tsasopyksapyrẽta” niy. Iwa Deus harere papeu humo niy. ¹⁰ Anaharere nitsasokoze Abarão ipiakzykyhybyita aibatohi zuba tapiakzyk — iwa nitsasoko. Iwatsahi mypiakzykywy humo kytsa sakurẽtsa ba zikaha. Deus kytsa pe my zeka:

— O ikiahatsa ahasopyksapyrẽtsa — my ana humo hi sakurẽtsa. ¹¹ Tapara Abarão Deus harere bo hyỹ nikara iwaze Deus ipe niy:

— Ikia tsasopyksapyrẽta — niy. Bykyze zuba tapiakpezyk, Deus humo tispirikporẽta iwatahi ityryktsa niyzik. Iwa tahi:

— Utakta Deus harere bo hyỹ ikykara iwaze Deus kape niy: “Ikia tsasopyksapyrẽta” — niy.

Iwata Sudeutsabyitsa kino niwatihi sizyzykyhybyitsa tu Deus harere bo hyĩ mykaranaha zeka Deus ispe my:

— Ikiahatsa ahasopyksapyrẽtsa — my. Abarão Deus harere bo hyĩ nikara Sudeutsabyitsa kino niwatihi Deus harere bo hyĩ nikaranaha iwaze Abarão tahadiri wata niyzik. ¹² Sudeutsabyitsa sipiakzyzykyhybyitsa tu Abarão watsa maha. Sipiakzyzykyhybyitsa tuze Deus harere bo zuba hyĩ nikaranaha. Sudeutsa niwatihi Abarão watsa mozurukunaha Deus harere bo zuba hyĩ mykaranaha iwaze Deus ispe niy:

— Kaharere bo hyĩ tsimykaranaha zeka ahasopyksapyrẽtsa — my. Asahi mydiri Abarão watsa maha.

Abarão Deus harere humo hyĩ ziknakara.

¹³ Tubabatu Deus Abarão pe:

— Mybarawy ty abo nyny my. Atsekokatsa nanabyitaba sizubarẽtsa hudikhudikwy pehat-sitsa moziknaha — niy. Abarão ana soho bo hyĩ niy. Batu sisopykwy bo pykyhy habyitatu. Atahi Deus harere bo zuba hyĩ nikara iwatahi Deus ihumo zisapywyky. ¹⁴ Kytsa asahi sisopykwytsa humo zuba pykyhytu yhyĩ mykaranaha zeka ana humo hi Deus mysisapywyky iwa zeka mytsaty ahabyitsa tu mykaranaha. Kytsa Deus harere bo hyĩ mykaranahaze isapyrẽnikia ty sibo nyny my. Iwa Deus mykara iharere wasani my.

¹⁵ Aty Deus harere ibyky pykyhytu yhyĩ mykara Deus okzeka tsimysapyrẽta tawata my atahi batu imysapy my. Batu aty tohi iharere ibyky humo yhyĩ zikaha. Iwatahi Deus batu iakparawy.

¹⁶ Iwatahi Abarão Deus harere bo hyĩ ziknakara ana humo Deus ipe niy:

— Utakta pasapywyky hĩ iwa mozihihikik — niy. Deus nikaraze pasapywyky iwaze atsatu mykara. Iwatsahi kytsa sizubarẽtsa Deus harere bo hyĩ mykaranaha Abarão watsa iwaze Deus mysisapywyky. Abarão mydiri wata. Abarão Deus harere bo hyĩ nikara, katsa kino niwatihi iharere bo hyĩ tsimykaranaha, iwatsahi ihumo myspirikporẽtsa tsimoziknaha.

¹⁷ Tubabatu Deus tapetu nikara:

— Kaokzeka Abarão aparakbahazo wata my. Atakta kaharere bo hyĩ mynakara asaktsa niwatihi nanabyitaba kaharere bo hyĩ mykaranaha iwata moziknaha — niy. Iwa Deus Abarão bo mytsaty niy. Deus ba hawa tohi zikzukninaha. Siakbatsa mynasihyrizikpowy. Ana ty hi mybarawy isuknihibyize taharere humo inatakaha. Kyze Deus Abarão pe:

— Ikia izo tsimozik. Atsekokatsa sizubarẽtsa maha. Kytsa sizubarẽtsa nanabyitaba ape mydiri mynakaranaha — niy. ¹⁸ Kyze Abarão tapetu nikara:

— Hawa Deus kape niy atsatu mykara — nikara. Nitsaikbata tu ihyrytsa byita. Iwatatu ziperyikik Deus harere bo hyĩ nikara, iwaze Deus harere humo tatse ziperyky. ¹⁹ Abarão nitsaikbata. Asiba sã anos niytyk tseheze itse nipuruk nitsaikbabaze. Ioke Sara kino niwatihi nitsaikbatatsa tu. Iwatatu tapetu ziknakara:

— O utakta katsebyita. Kaoke niwatihi itsaikbatatsa ba ziktabykyhy. Iwatatu Deus harere

bo hyŷ mykara iwatahi katse mopuruk — niy.
²⁰ Iwatahi batu tyso:

— Tozeka ja Deus katse kabo myzipeha ja — iwa batu tapetu ziknakara. Atahi:

— Utakta iktsaikba iwatahu Deus harere humo katse mopuruk. Deus pe niy “ikia zuba amysapyrēnikita. Piksapywyikik” — nikara. Pibytuhukutu Deus harere bo hyŷ ziknakara.
²¹ Abarão hi:

— Kytša zikahabara ty atsatu Deus mykara, iwatahi izikwy humo katse mopuruk — my. Iwa tapetu ziknakara. ²² Iwatahi Deus ipe niy:

— O kaokzeka wasani tsimy — niy. Iharere bo hyŷ mykaraze tu Deus okzeka tisopyksapyrēta niyzik. ²³ Deus harere papeu humo botu ziwatahaka:

— Abarão Deus okzeka tisopyksapyrēta — niy.
²⁴ Ana harere myhumo kino niwatihi ziwatahaka. Taparaktsa papeu humo ziwatahanahaze:

— Ikiahatsa ahasopyksapyrētsa tsimoziknaha. Deus harere bo hyŷ tsimykaranaha zeka Abarão wata — iwa taparaktsa nimyhyrinymyrykynaha. Deus humo Abarão oke tatse zipuruk.

Deus tse Sesus Kiristu inahyryzikpowy iwatsahi katsaktsa iharere bo hyŷ tsimykaranahaze Deus mypehatsa mozik. Sesus Kiristu zihyryzikpowy ata bo hi hyŷ tsimykaranaha. ²⁵ Deus tse Sesus Kiristu mybarawy bo inasik. Mysapybyitsa tu tsikykaranaha humo nihyrikosokda. Mysapy zeky nihyrikosokda ana hi. Myhuak niyzik, abaka mysapybyitsa tu tsikykaranaha katse humo mymokzohik. Deus zihyryzikpowyze mype my:

— Ikiahatsa Sesus harere bo hyŷ tsimykaranaha zeka katse humo ahasopyk-sapyrĕtsa tsimoziknaha — niy.

5

Deus harere bo hyŷ tsimykaranaha zeka ana humo hi myspirikporĕtsa tsimoziknaha.

¹ Abaka katsa Sesus harere bo hyŷ tsimykarana-haze mykurĕtsa tsimoziknaha. Batu paikpa myt-saty tsimykaranaha. Taparaka Deus myhumo taokaniki abaka mahani. Sesus harere bo hyŷ tsimykaranaha iwatsahi Deus harereziuwytša tsi-moziknaha. ² Sesus Kiristu hi:

— Asaktsa kaharere bo hyŷ mykaranaha — niy. Iwaze Deus myhumo mymysapywyky iwatahi mymytsumuĕhĩĩ iwa tsimyzurukunaha. Ana humo hi mykurĕtsa, aibatohi Deus watsa tsimozik-naha anahi taperykynaha.

³ Abaka tsihokdaharĕna humo sinini tsimykaranaha zeka mykubyrisorokrĕtsa tsimoziknaha. Mypunihikrĕtsa tsimoziknaha. Iwatsahi mykurĕtsa hŷ. ⁴ Mykubyrisorokrĕtsa zeka Deus mype:

— O ikiahatsa ahamysapyrĕtsa — my. Iwa myhumo mymybetesakaze. Iwatsa tsimoziknaha ana hi taperykynaha. ⁵ Aibatohi Deus watsa tsi-moziknaha anahi wasani hŷ. Ana hi taperykyze wasani mytsaty tsimykaranaha, Deus myhumo tsimypokzitsiukrĕta tahyrikoso humo kino mymy-hyrinmyryky.

⁶ Katsaktsa mysapybyitsa tsikykaranahaze Kiristu mypokzi mysapyzeken nihyrikosokda. Nawa zuruze Deus botu ziwatawyze Kiristu

nihyrikosokda. ⁷ Batu aty tohi usta sapyzeken ba zikyhyrikosokda. Aty zeka ja sisopyktsa pykyhytu yhy mykara tsihokdaharena isapyzeken mohyrikosokda batu aty tohi mohyrikosokda tsihikik. Atakta ustsakysa humo mysisapywyikik tozeka ja aty zeka isapyzeken mohyrikosokda.

⁸ Kiristu ta meky watu my. Katsakta mysapybyitsa tu tsikykarannahaze iwaze hi Kiristu mysapyzeken nihyrikosokda. Kiristu mysapyzeken nihyrikosokda ana bo hi mytsaty tsimykaranaha. Deus myhumo tsimypokzitsiukreta babata ana humo hi myhyrinymyreta. ⁹ Kiristu mysapyzeken nihyrikosokda abaka iharereziuwytas tsikyziknaha. Ihumo Deus mype:

— O ikiahatsa ahamysapyreta — mykara. Iwatahi Deus sinini ykarawy bo ba zikmypeha iwa hy.

¹⁰ Tapara tuze katsakta Deus sukyrytsitsa tsikykaranaha. Abaka mahani. Katsakta iharereziuwytas tsimaha, Kiristu mysapyzeken nihyrikosokdaze iwatsahi Deus harereziuwytas ihumo tsikyziknaha. Abaka katsa Deus harereziuwytas tuze Kiristu ispitu niyzikzo mymytsumuehiki hy. Hawa mozihikik izikwy humo hi tsimykaranaha. ¹¹ Sesus Kiristu mypokzi nihyrikosokda iwaze Deus harereziuwytas tsikyziknaha. Ana humo kino Deus hi:

— O ikiahatsa kaharereziuwytas — niy. Iwatsahi mykureta hy.

Taparakta Adão Kiristu ahatsa soho mytsatyziutsimykaranaha.

12 Taparakta Adão Deus nizukni atahi isopyksapybyita nikaraze nihyrikosokda. Abaka katsa mywatu mysopyksapybyi humo tsimykaranhaze Adão watsa tsimhyrikosokdanaha. 13 Taparaktsa Deus harere ibyky Moises ziwataha humo sihyrinymyrybyitsa tu iwatsa hi sisopyksapybyitsa tu nikaranaha ana humo hi nihyrikosokdanaha. 14 Iwaze mybarawy ezektsa sisopyksapybyitsa nikaranaha nihyrikosokdanaha. Simysapybaratsa nikaranaha batu atsatu Adão sapybyri waka niy. Kytsa sizubarêtsa simysapybyitsa tu nikaranaha humo mohyrikosokdanaha.

Adão soho bo mytsaty tsimykaranhaha. Itsekokatsa iwata sisopyksapybyitsa tu nikaranaha. Asaktsa Sesus Kiristu harere bo hyĩ mykaranhaze ityryktsa moziknaha iwata moziknaha simysapyrêtsa moziknaha. 15 Asaktsa petoktsa meky watu maha, Adão Kiristu ahatsa. Adão estuba zubata atahi Deus harere bo batu hyĩ ziky iwaze isopyksapybyita tu nikara itsekokatsa kino niwatihi iwata sisopyksapybyitsa tu nikaranaha, iwatsahi sinini nikaranaha.

Kiristu ata zubata niwatihi atahi Deus harere bo hyĩ ziknakara. Deus imysapyrênikita tu isapyrênikia ty kytsa bo nyny isopyk. Mymysapywyikik. Atahi Kiristu mybo inasik mysopyksapybyitsa tu mykaranhaha ihumo mymyokzohik. Iwaze Kiristu ata zubata tu nimysapywyiky atahi nihyrikosokda anahumo kino kytsa sizubarêtsa ihumo simysapyrêtsa moziknaha. 16 Deus kytsa bo mysisapywyiky ahabo motsasoko. Kytsa sisopyksapybyitsa tu mykaranhaha Adão humo ahabo

motsasoko. Adão Kiristu ahatsa meky watu maha. Adão isapybyita niyze Deus ipe niy:

— Kaokzeka batu amysapy — niy. Mybarawy ezeiksa, Adão tsekokatsa tu simysapybyitsa tu mykaranaha iwatahi Deus ispe my:

— Kaokzeka batu ahamysapy tsimykaranaha — niy. Sisopyksapybyitsa tu nikaranaha iwatahu asaktsa Sesus Kiristu harere bo hyĩ mykaranaha Deus ispe my:

— Kaokzeka ahamysapyrẽtsa — my.
¹⁷ Taparakta Adão imysapybyita tu nikara. Itsekokatsa niwatihi iwatu sisopyksapybyitsa tu nikaranaha. Iwatsahi mybarawy ezeiksa mohyrikosokdanaha. Sesus Kiristu tsimysapyrẽta tu nihyrikosokda. Iwatsahi ihumo Deus mymysapywyikik. Kytsa Sesus Kiristu harere bo hyĩ mykaranahaze Deus ispe my:

— Kaokzeka ahasopyksapyrẽtsa — my. Iwatsahi asaktsa Deus tuk tahawahi mynapykyryknaha, Kiristu zikwy humo sipunihikrẽtsa moziknaha.

¹⁸ Iwaze taparakta Adão isopyksapybyita tu nikara. Deus harere bo batu hyĩ niy. Itsekokatsa niwatihi iwata sisopyksapybyitsa tu nikaranaha. Iwatsahi Deus ispe niy:

— Ikiahatsa batu ahamysapy iwatsahi ahawahi sinini tsimykaranaha — niy. Sesus Kiristu Deus harere bo hyĩ ziknakara iwazehi mybarawy ezeiksa iharere bo hyĩ mykaranahaze Deus tuk tahawahi mynapykyryknaha. ¹⁹ Estuba maku Adão inarokota Deus harere bo batu hyĩ niy. Iwatahi ihumo mybarawy ezeiksa Deus okzeka

batu simysapy niyziknaha. Adão watsa zimyik-inaha. Sesus Kiristu atahi Deus harere bo hỹ ziknakara. Iwatahi Deus kytsa sizubarẽtsa pe:

— Kaokzeka ahamysapyrẽtsa tsimoziknaha. Kaharere bo hỹ tsimynakaranaha Kiristu watsa batu mymyiwy — my.

²⁰ Tubabatu Moises Deus harere ziwatahaka. Ataharere humo Moises sopykwy nisihrinymyry. Mybarawy ezeiksa ana harere humo batu h̃ niaha, iwaze sisopyksapybyitsa naobaranaha. Kytsa sisopyksapybyitsa tu nikaranaha niubara iwaze Deus isapyrẽnikia kino niwatihi niubara. Atahi imysapyrẽnikita my.

²¹ Iwaze mybarawy ezeiksa sisopyksapybyitsa ziknakaranaha mohyrikosokdanahaze sinini ykarawy bo maha. Deus hi imysapyrẽnikita nimysapywyky, iwatahi Kiristu mybarawy bo inasik mysopyksapybyitsa tsimykaranaha Deus ihumo mymyokzohik. Mysopyksapybyiri tawahi tamowey iwatsahi Sesus harere bo hỹ tsimykaranaha zeka tsimyhyrikosokdanahaze Deus tuk mywahi tsimynapykyryknaha h̃.

6

Mysopyksapybyika tamowey. Deus harere bo hỹ tsimahaktsa.

¹ Kyze mysopyksapybyitsa tu tsimykaranahaze iwa zeka Deus mymysapywytohi. Ana humo hi tozeka ja wastuhu kytsa tihi:

— Mysopyksapybyitsa tu tsimahaktsa kytsa! Iwaze Deus isapyrẽnikia ty mybo nyny my h̃ — maha. ² Nawa batu tyso. Nihyrikosokdata batu amy tohi ty ziky. Iwatsa katsa Sesus

Kiristu harere bo hyĩ tsimykaranaha zeka mysopyksapybyitsa tu tsikykaranaha batu tsihik. ³ Nimyharasusunahaze Kiristu tuk tsinapykyryknaha, iwatsahi iwata atsatu mytsaty tsimykaranaha ana hi ahahyrinymyrẽtsa hỹ. Kytsa nimyharasusunahaze mysopyksapybyi tsmoewynaha, nihyrikosokdata wata mysopyksapybyity ka ba zikahazonaha. ⁴ Nimyharasusunahaze:

— O hawa Kiristu mozihihik naha wa zuba hyĩ tsimykaranaha — maha ana hi ziwatawy. Kiristu nihyrikosokda izo hi nizihikik Deus zikwy humo inahyrizikpo. Iwata hawa Kiristu mozihihik ana humo hi hyĩ tsimykaranaha, iwaze mysopyksapybyritsa tu tsimykaranaha tamoewynaha Sesus watsa mytsatyzo, meky watu tsimyzurukunaha. Sesus zikwy humo meky watu tsmoziknaha.

⁵ Kiristu mysapyzeken iharapatawyhyta humo nihyrikosokda. Ana hi nizihikik. Katsaktsa mysopyksapybyiwy tamoewyba. Ana hi tsimyzihikiknaha. Deus zikwy humo Kiristu inahyrizikpo. Katsa meky watu tsmoziknaha Sesus Kiristu zikwy humo mekywa tu tsimyzurukunaha. Ihumo zuba mysapyrẽtsa tsmoziknaha.

⁶ Tapara hawa ha ty batu imysapy tsikykaranaha. Abaka hawa haty imysapybara ty batu typeha zikaha. Mysopyksapybyitsa tu tsikykaranaha mysukatsihikrẽtsa tsikaha. Abaka meky watu tsmoziknaha, meky watu tsimyzurukunaha tisapyrẽna humo zuba tsimyzihikiknaha. Kiristu nihyrikosokdaze izikwy zuba mytuk mynapykyryk, izikwy humo

zuba meky watu tsimyzurukunaha, katsakta tasapywyky myzo wata tsimaha.

⁷ Aty mohyrikosokda zeka batu amy tohi bo mytsaty zikaha. Iwaze atakta nihyrikosokdaze, tasapybyi ty ziknakara batu ziky, imysapybara ba zikzihik.

⁸ Iwatsahi Kiristu tuk tsinapykyryknaha. Kiristu mysapyzeken nihyrikosokda iwahahi nizihikik. Katsakta mysopyksapybyitsa tu tsimykaranaha tamoewy tsihikik iwatsahi Kiristu tuk mywahi tsinapykyryknaha, iwa mytsaty tsimykaranaha. ⁹ Kiristu nihyrikosokdaze petok zuruze Deus zihyrizikpowy. Abaka ba zikyrikosokdazo. Tawahi mynapykyryk. Ba hawa tohi zikzoninaha.

¹⁰ Nihyrikosokdaze mysopyksapybyiwy ihumo nisiokzohik. Estuba zuba nihyrikosokda ba zikyrikosokdazo. Abaka Deus tuk tawahi mynapykyryk, Deus mozihihik naha ty zuba mynakara. ¹¹ Iwatsahi ikiahatsa ahasopyksapybyiwy tsmoewynaha kytsa meky watu tsmoziknaha. Kiristu harere bo zuba hyÿ tahakta ana humo hi mytsatziu taha!

¹² Iwatsahi imysapybara ba zikzihiknaha. Imysapybara bo ka mytsaty mytsaty byitaha! Batu tyso — Estuba zuba imysapybara piakpy tsihikik — iwa ba zikaha. ¹³ Ikiahatsa Deus tyryktsa. Deus zuba ahapehakatsa. Iwatsahi ahasopyksapybyitsa tsimykaranahaze niwazuba pyktaha! Tapara imysapybara ty tsikykaranaha iwaze hi sinini tsikykaranaha. Abaka mekywa tu tsimyzurukunaha, Deus tuk ahawahi tsinapykyryknaha. Iwatsahi Satanas harere bo batu hÿ tsimaha. Mekywa

tu tsimaha iwaze tu tyzisapywykynahaktsa! Ikiahatsa tihi:

— O Deus myzo ikia zuba tynamypehakakta. Ikia zuba tymytsumuēhīkta iwaze azikwy humo wasani tsimyzurukunaha — tsimaha. Iwa Deus pe tsimahaktsa! ¹⁴ Abaka Deus mype:

— Ikiahatsa ahasopyksapyrētsa — my. Iwa mybo motsasoko atahi mymysapywyky iwatsahi ihumo zuba wasani tsimykaranaha. Tapara katsaktsa Moises sopykwy bo yh̃y tsikykaranaha zeka iwa batu tyso. Iwaze Deus mymysapywyky ana humo hi Satanas harere bo batu h̃y mysopyk. Imysapybara ty ka ikiahatsa ba ziaksenaha.

Abaka Deus harere bo zuba hỹy tsimykaranaha.

¹⁵ Katsaktsa Deus okzeka mysapyrētsa tsimoziknaha. Deus hi Kiristu zipedahik mybarawy bo inasik atahi mypokzi nihyrikosokda nawa Deus mybo zisapywyky. Moises sopykwy bo yh̃y tsikykaranahaze ana humo hi mysopyksapybyitsa tu tsikykaranaha, sisopykwy bo yh̃y tsikykaranaha. Abaka Sesus harere bo hỹy tsimykaranaha zeka ana humo hi Deus okzeka mysapyrētsa tsimoziknaha. Tozeka ja ana humo hi wastuhu kytsa tihi:

— Katsaktsa mysopyksapybyitsa tu tsimykaranaha zeka wasani tsimaha — iwa motsasokonaha zeka batu imysapy. ¹⁶ Ikiahatsa aty bo tsimaha zeka:

— O ikia kapehatsa — tsimaha.

Yhỹ atakta ahapehatsa mozik. Iharere humo zuba ma tsimykaranaha. Batu petoktsa ahapehatsa, estuba zuba ahapehatsa. Aty zeka imysapybara ty myzihikik atsatu mykara, atahi mohyrikosokdaze sinini ykarawy bo my. Aty zeka Deus harere bo hyỹ mykara Deus ibo pisapywyky hawa tisapyrēnikia ty mozihikik, iwatsahi wasani mykaranaha, mohyrikosokdanahaze Deus tuk tahawahi mynapykyryknaha. Anaharere botu ahahyrinymyrētsa batu petoktsa ahapehatsa ana humo hi mytsatyiutahaktsa kytsa tsimaha.

¹⁷ Taparaka mysapybyitsa tu tsikykaranaha batu pyk tsikaha. Iwaze Deus soho wasania ty tsiwabytnaha. Tsiwabytokto nahaze ana myhyrinymyrywy wasani baba iwatsahi hyỹ tsikykaranaha. Iwaze Deus pe:

— O ikia zuba amysapyrēnikita — tsimykaranaha. ¹⁸ Deus zikwy humo amy ty sa tisapyrēnikia ty zuba tsimyzihihikknaha. Deus zikwy humo imysapybara tamoewynaha. ¹⁹ Taparaka tsikmysapybyrikinaha. Imysapybara ty tsikykaranaha. Abaka Deus okzeka ahamysapyrētsa tu iwatsahi isapyrēnikia ty zuba tsimykaranahaktsa!

²⁰ Tsimyiwynahaze batu wasani tsimyzurukunaha. Ahamysapybyitsa tu tsikykaranahaze Deus harere bo ma ahabyitsa tsikykaranaha. ²¹ Tsimysapybyikinahaze imysapybara ahahuak mozik. Imysapybyikia ty zuba tsiapiaksenaha. Kytsa simysapybyikitsa sinini ykarawy bo maha. Iwatsahi ahamysapybara humo mytsaty tsimykaranahaze ahasikpybyrētsa tsimoziknaha.

22 Abaka meky watu tsimaha. Deus hyrikoso botu ahatuk mynapykyryk iwatsahi ahamysapybyitsa tu tsikykaranaha ba ziktsihiknaha. Imysapybara humo kazekta niwazuba Sesus Kiristu wata tsimoziknaha ana hi ahahuak mozik. Tsimyhyrikosokdanahaze Deus tuk ahawahi tsimynapykyryknaha.

23 Asakta sisopyksapybyitsa mynakaranaha humo mohyrikosokdanahaze Deus tuk ba zikokpykyryknaha, sisapy metutu batu Deus tuk zikaha. Utsakta Sesus harere bo hỹ mykaranaha Deus tuk tahawahi mynapykyryknaha. Simysapyr̃tsa iwaze Deus mysisapywyky ana humo hi ituk mynapykyryknaha. Asahi Sesus Kiristu tuktsa iwata mytsaty mykaranaha. Iwaze Deus kytsa bo mysisapywyky. Sesus namy huak mahaka kytsa ba kōpara zikaha, Deus hi Sesus tuktsa bo nyny isopyk ituk tahawahi mynapykyryknaha.

7

Maku tasukzazeky ana humo hi mymyspirikpowyky.

¹ O katukytsa aokze tuze zuba mybarawy eze-ktsa sopykwy ty yh̃ tsimykaranaha. Tsimyhyrikosokdanaha zeka sisopykwy bo batu h̃ zikaha. Ana humo hi ahahyrinymyr̃tsa.

² Iwa wytyk ipytsakatatsa tuze tabarikta tuk napykyryk, ibarikta atatu zeka atatsa kino ituk napykyryk. Iwa mybarawy eze-ktsa sopykwy. Ibarikta mohyrikosokda zeka meky watu maha. Atatsa haramukuka mozik iwatatsatu mektatu pi-akse wasani my. Mybarawy eze-ktsa sopykwy.

— Ikia usta maku piakse wasani my — maha.
³ Atatsa ibarikta atatu zeka mektatu ba ziaксе-
naha, pihuahua zeka mybarawy ezektsa sopykwy
tihi:

— Atatsa batu imysapy — maha. Ibarikta mo-
hyrikosokda zeka mektatu piakse zeka wasani
my. Ibo tahyrizikwy zeka mybarawy ezektsa
sopykwy humo wasani my.

⁴ O katukytsa ikiahatsa atatsa watsa tsimaha.
Tapara ikiahatsa hi:

— Deus harere Moises sopykwy bo yhỹ
tsikykaranaha iwatsahi mysapyrētsa — iwa
mytsaty ahabyitsa tu tsikykaranaha. Ana harere
batu wasani my. Moises sopykwy bo hỹ batu
zikaha iwatsahi iharere tsmoewykbaiknaha
atatsa watsa. Atatsahi ibarikta nihyrikosokdaze
zerekik iwaze usta tuk mynapykyrykze wasani
my. Abaka ikiahatsa Sesus tuk mynapykyryk
ihumo ahamysapyrētsa tsmoziknaha. Atahi
mysapyzeky nihyrikosokda, iwatsahi iharere bo
zuba hỹ tsimykaranaha, ihumo myspirikporētsa
tu zeka mysapyrētsa tsmoziknaha. Iharere bo
zuba hỹ tsimykaranaha iwaze ustsа kytsa bo
izikwy humo tysisapywykynaha.

⁵ Taparaka nawaha zuba katsaktsa tsikzihikik-
naha astsatu tsikykaranaha. Mybo zuba myt-
saty tsikykaranaha. Deus harere tsiwabynahaze
imysapybara humo tsinymyrykynaha. Iwatsat-
uze mysapybyitsa tu tsikykaranaha Deus mytuk
ba zikypykyryk, sinini ykarawy bo tsimaha.

⁶ Tapara Moises sopykwy bo yhỹ tsikykarana-
hatsa watsa katsaktsa ana kino iharere bo
hỹ batu zikaha. Abaka Deus namykse,

iwatsahi izikwy humo Deus harere bo hyŷ tsimynakaranaha. Mekywatsatu tsimoziknaha Deus hyrikoso mytuk mynapykyryk. Iwaze Deus mozihihikize ana ty hi yhŷ tsimykaranaha ihyrikoso humo. Moises sopykwy ana kino Deus harere ibyky papeu humo botu ziwatahaka ana humo ka batu hŷ tsimaha, ana humo hi simysapybyitsa nikaranaha.

Moises Deus harere ibyky ziwataha ana humo nimyspirikpoko.

⁷ Tozeka ja wastuhu kytsa tihi:

— Moises sopykwy, Deus harere ja. Hawa sa Moises nimyhyrinymyky batu sapy ja — maha. Batu ba. Iwa batu tyso. Ana harere humo hi Deus okzeka batu sapy nimyhyrinymyryky. Deus harere Moises ziwatahaka:

— Utsa namy humo ahazokdibyrhuktsa — my. — Usta namy ty mozihihik zeka ana harere bo hi mytsaty mykara, hawa batu imysapy mykara pihyrinymyryky. Moises sopykwy humo kaspirikporēta.

⁸ Ana watahaha zinyze ustsā kytsa namy mozihihik zeka Deus okzeka batu imysapy. Iwatatu usta namy ikzihihik ana watahaha humo hi. Ana harere tisapyrēna iwaze hawa Deus okzeka batu kasapy pikwatawy. Deus harere tisapyrēna. Amy ty sa mozihihik ana ty hi batu imysapy. ⁹ Taparaka Deus harere humo batu kahyrinymyry mytsaty habiyita ziknakara.

“Utakta Deus okzeka kamysapyrēta” — ziknakara. Kyze iharere humo ikspirikpokoze amy

ty batu imysapy kahyrinymyrëta. Iwaze kapetu kasopyk:

— O utakta kamysapybyita tu mykara. Deus okzeka batu imysapy — ikykara. ¹⁰ Deus harere mybo nitsasoko iwaze mymytsumuëhĩkĩ iharere humo hyỹ tsimykaranaha zeka mywahi ituk tsimynapykyryknaha. Ana harere humo hi kapetu kasopyk:

— Utakta kamysapybyita tu ikykara iwatahi Deus tuk kawahi ba zik kapykyryk. Kamysapybyita tu ziknakara ana humo hi Deus tuk ba zik kapykyryk — ikykara. ¹¹ Taparaka katuktu zuba mytsaty ziknakara:

— Utakta kamysapyrëta — mybarapetu ikykara. Kamysapybyita tu ikykara. Kapetu kasopyk zeka kamyspihikbatarëta mykara. Kyze Deus harere ty zinymyrykyze kamysapybyita tu ikykara ana humo hi kahyrinymyrëta ikyzik. Kamysapybyita tu ikykara Deus tuk kawahi ba zik kapykyryk zinymyryky.

¹² Iwaze Deus harere ibyky anatyhi Moises ziwataha isopykwy wasani my. Anahi mybo niza-piksoko Deus harere my. Ana harere humo hi amy ty wasani mymywatawyky iwatahi kytsa mysitsumuëhĩ. Ana harere hi isapyrënikia hỹ. ¹³ Aty zeka ja:

— Ana harere humo Deus tuk kawahi ba zik kapykyryk kamysapybyi humo iwatahi iharere batu imysapy — my. Deus harere isapyrënikia zuba. Ana harere humo mybarawy ezektsa simysapybyitsa tu nikaranaha soho mysihyrinymyrykynaha. Kytsa ana harere tyhi sihyrinymyrybyitsa tu iwatsahi tahapetu sisopyk:

— Katsaktsa mysapyrētsa tsimykaranaha — mytsaty ahabyitsa nīkaranaha. Utakta Deus harere iwabyze kapetu kasopyk:

— Utakta Deus okzeka kamysapybyita tu ziknakara — iky.

Moises Deus harere ibyky ziwatahaka naha humo mytsatyziu ikykara.

¹⁴ Kyze tubabatu Deus harere ty mybo niy. Ihyrikoso humo iharere ziwataha. Deus harere ibyky Moises nimyspirikpoko. Anatyhi isapyrēnikia ty tsipinymyrykynaha. Utakta zuba batu kamysapy mynakara, kasapybyita tu mynakara. Amy ty sa batu imysapy ana kino yh̃ mynakara iwatatu batu ity tsihik. Tabo zuba mykara zeka iwaze Deus hyrikoso bo batu h̃ ziky. ¹⁵ Amy ty batu imysapy mykaraze kapetu kasopyk:

— Amy skaraba kamysopyksapy mykara. Ana kino batu ity tsihik — my. Kamysapybyita tu mykaraze kapetu kasopyk:

— Amy skaraba ana ty hi iky. Isapyrēnikia ty zuba kakparawy, iwatatu batu kamysopyksapy iky — my. ¹⁶ Iwatahi kamysopyksapybyita tu kapetu kasopyk:

— Utakta kamysopyksapybyita tu Deus harere zuba tisapyrēna — mykara. Amy skaraba batu imysapybara h̃ mozihihikike anatihi mykara. ¹⁷ Amy skaraba batu imysapy batu ity tsihik. Hawa mozihihikike wasanikia ty ana kino kakparawy. Iwatatu hawaha batu imysapy mykara. Wasanibiyikia ty yh̃ ikykara iwatahi pimysapybyriwyky. ¹⁸ Uta pisapywy tsihikik batu ziky.

Hawa wasanikia ty mozihihikik batu ziky. Is-apyrēnikia batu katuk my. ¹⁹ Wasaniha ty mozihihikik. Kyze imysopyksapy mykara. Hawa wasanibyikia ty batu ity tsihihik iwataatu atsatu mynakara. ²⁰ Hawa mozihihikik ana humo hi batu mynakara. Amy humo wasanibyikia ty katuk mynapykyryk ana humo hi kamysopyksapybyita tu ziknakara.

²¹ Iwaze wasanikia ty mozihihikik zeka ana kino batu ziky. Wasanibyikia ty zuba mynakara. Iwa mozuruku. ²² Uta hiba Deus harere humo kakurēta mynapykyryk. ²³ Pisapywy tsihihikikta tu imysapybara ty zuba mynakara. Imysapybara zuba katuk mynapykyryk iwatahi kamysapybyita tu mynakara. Kapunihikbyita iwatahi yhy zuba kasopyk. Iwatahi batu kaku. ²⁴ Kasukatsihikrēta hy.

— Aty sa piktsumuēhī. Utakta sinini ykarawy bo my. Aty sa pikykse — mykara.

²⁵ Sesus Kiristu mypehakatsa pikykse hy. Ata hi ipunihikanikita, iwatahi izikwy humo kapunihikrēta mozik. Iwaze uta Deus pe my:

— O ikia zuba amysapyrēnikita — mykara. Uta zubaze imysapybara ty zuba mynakaraze, Kiristu zikwy katuk byizeka imysapybara ty mynakara.

Utakta Kiristu zikwy humo Deus harere bo hy mynakara, iwaze imysapybara humo ka ja katy peha peha byity. Niwazuba mynakara.

8

Deus hyrikoso mytuk mynapykyrykze meky watu tsimyzurukunaha.

¹ Iwatsahi abaka asaktsa Sesus Kiristu zikwy humo mozurukunaha simysapyrëtsa moziknaha. Iwatsahi Deus batu sibo tyso:

— Sinini ykarawy bo pahapeha — iwa batu tyso. ² Deus hyrikoso pikpehaka iwaze izikwy katuk mynapykyryk, ihyrikoso pikpehaze ba zimyi. Iwatahi wasanibara humo ka ja katy peha peha byity. Deus sinini ykarawy bo ba zikpeha. ³ Katsaktsa mypunihikbyitsa tu Deus harere bo batu yhỹ tsimykaranaha. Iwatsahi Deus okzeka batu imysapy hỹ, iharere bo ka batu hỹ ziknakaranaha. Iwaze Deus tatse mybarawy bo zipeha, mywata niyzik. Atahi tsimysapyrëta mybarawy bo inasik mywata niyzik. Ata zuba mybarawy ezeaktsa tuk imysapyrënikia ty ziknakara. Iwatahi mysapyzeke nihyrikosokda. Mysapybyikitsa tu tsikykaranaha iwatahi nimysapyzeke abaka izikwy humo mysapybyikitsa tu tsikykaranaha tsimoewynaha. Ihumo batu mymyi.

⁴ Deus iwa niy, imysapyrënikia bo zuba tsimykaranaha. Abaka Deus zikwy humo iharere bo hỹ tsimykaranaha. Ihyrikoso hi mytuk mynapykyryk iwatsahi Deus harere bo ma tsimykaranaha. ⁵ Asaktsa taha bo zuba mytsaty mynakaranaha iwahi mozihihiknaha zuba mykaranaha. Utsaktsa Deus hyrikoso bo yhỹ mynakaranaha Deus harere zuba mysipehaka iwa Deus mozihihik ana ty hi zuba mykaranaha.

⁶ Asaktsa taha bo zuba mytsaty mynakaranaha sinini mykaranaha. Deus tuk ba ziktahasapynaha. Utsaktsa Deus hyrikoso mozihihik ana bo hi mytsaty mynakaranaha atahi mysiakuwyky.

Ba paikpa mytsaty zikaha. Deus tuk tahawahi mynapykyryknaha. ⁷ Aty zeka ta humo zuba mytsaty ziknakara zeka tsiakyriukrêta mozik. Deus harere bo batu hyÿ my ana harere bo ka ba hÿ ziky. ⁸ Aty zeka tahumo zuba mozihihik ana ty hi mykaraze Deus ihumo batu iaku.

⁹ Iwaze ikiahatsa hi Deus hyrikoso bo hyÿ tsimykaranaha. Iwaze hawa skaraba taha humo pahapehakanahaze batu hÿ tsimaha Deus hyrikoso humo pahatsumuêhĩkĩ. Deus hyrikoso ahatuk zikypykyk byizeka batu Deus hyrytsa zikyziknaha. ¹⁰ Kiristu ahatuk mynapykyrykyk zeka ihyrikoso pahapehaka iwa ihumo meky watu tsimoziknaha. Ahamysapybyitsa tu tsikykaranaha anahumo hi tsimyhyrikosokdanaha iwatsatu Deus hyrikoso humo myspitu tsimozikzonaha. Iwa Kiristu nikara. Kiristu mysapyzekenihyrikosokdaze Deus okzeka ahamysapyrêtsa tsimoziknaha, iwatsahi Deus hyrikoso humo myspitu tsimozikzonaha. ¹¹ Deus hi Kiristu zihyirizikpowy. Deus hyrikoso ahatuk mynapykyryk zeka tsimyhyrikosokdanahaze ana humo kino niwatihi mynamyhyrizikpowy Sesus Kiristu wata. Iwa my ihyrikoso humo, atahi ahatuk mynapykyryk. Izikwy humo mynury ezytyk mozikzo tsimaha.

¹² O katukytsa hawa Deus hyrikoso mozihihik naha humo tahaktsa! Deus mymysapywyky iwatsahi mysapybyiwy tsimoewynaha. ¹³ Ikiahatsa ahabo zuba tsimynakaranaha zeka Deus tuk batu ahawahi tsimynapykyryknaha. Ikiahatsa hi ahape tu ahasopykze:

— Mysapybyitsa tu tsimykaranaha zeka Deus zikwy humo imysapybara tsimoewynaha — tsimaha. Iwaze Deus tuk ahawahi tsimynapykyryknaha. ¹⁴ Asaktsa Deus hyrikoso mysipehaka iharere bo zuba hyŷ mynakaranaha asahi Deus hyrytsa babatsa maha. ¹⁵ Deus hyrikoso inamykse. Ihyrikoso humo Deus myzo mozik, katsa ihyrytsa tsimoziknaha. Ana humo hi batu mypyby, batu ba, katsaktsa Deus pe mysopyk:

— O kazo ikia myzo babata — tsimykaranaha. Deus hyrikoso mytuk zeka iwa tsimytsasokonaha hŷ.

¹⁶ Ihyrytsa babatsa tsimoziknahaze Deus pe:

— Myzo — tsimaha. Ihyrikoso atsatu mynakara. Atahi mype:

— Ikiahatsa Deus hyrytsa babatsa — mynakara. ¹⁷ Iwaze katsa Deus hyrytsa tsimoziknahaze Deus isapyrēnikia ty mybo nyny my ihyrikyky wata. Deus isapyrēnikia ty Kiristu bo botu nyny niy. Katsa kino niwatihi Kiristu tuk isapyrēnikia ty mybo nyny my. Abaka kytsa humo sinini tsimykaranaha, asaktsa Sesus harere bo batu hŷ zikaha mymysukyrykynaha. Aiba zuba Kiristu atsaezubaha mysipehaka katsa kino niwatihi itukytsa mysipehanaha, batu sininizo zikaha.

Sesus Kiristu humo Deus tsizubarēna ty nizukni mymysapywyky.

¹⁸ Katsaktsa mybarawy eze tu sinini tsimykaranaha. Aiba zuba mysapyrētsa tsimoziknaha hŷ. Batu amy tohi anawata hawa sinini tsiknakaranaha mopykbaik. Amy

ty imysapynikia ty tsizubarēna ezytyk mozik. Iwatsahi batu paikpa mytsaty tsimahaktsa!
¹⁹ Tsizubarēna Deus nizukni ana hi aparakbaha taperyky. Deus hi:

— O asaktsa kahyrytsa. Asahi katse babata watsa — my. Ana harere hi tapery.

²⁰ Mybarawy Deus nizukni tisapyrēna my kytsa humo zuba zimiwy. Aiba zuba mybarawy ezytyk mozik. Taparakta Adão isopyksapybyita nikara ihumo hi mybarawy zimiwy. Deus hi mybarawy nizukni Adão imysapybara humo batu imysapy niyzik. Iwatsahi tsizubarēna Deus nizukni taperykynaha. Deus mybarawy ezytyk mozuknizo ana hi taperykynaha. ²¹ Katsaktsa Sesus Kiristu wata tsimoziknahaze mybarawy ezytyk mozik. Ba zikpyk isapyrēnikia mozik hỹ.
²² Abaka tsizubarēna Deus nizukni sinini mykara, batu ezytyk bara hi iwaha hi mybarawy wytyk watatsa, atatsahi tabykyhy piperykyze tsimyt-sapyrētatsa. Itse mopurukze zuba tsakurētatsa mozik. Katsa kino niwatihi mybarawy ezytyk taperyky bykyze mykurētsa hỹ.

²³ Katsa niwatihi tsipiperykynaha. Deus myzo abaka katsa batu mymypykyhy, myraparētsa, myrapukrētsa imysapybara mytu mynapykyryk. Iwatsahi batu myku. Aiba zuba mykurētsa tsimoziknaha botu Deus mymysapywyky abaka Deus hyrikoso mytuk mynapykyryk atahi mymyhyrinymyryky. Atahi:

— Aiba zuba Sesus Kiristu wata tsimoziknaha. Deus ahasoho “asaktsa kahyrytsa babatsa” my. Ahanury ty ezytyk ty ahabo nyny my — Deus

hyrikoso my. Mekywatu tsimoziknaha. Iwa mymyhyrinymyryky ana hi taperyky.

²⁴ Deus inamykse. Iharere bo hyỹ tsimykarana-haze inamykse ata humo hi meky watu tsimoziknaha ana humo hi myhyrinymyrẽtsa hỹ. Abaka meky watu tsimoziknaha, aiba zuba Kiristu wata tsimoziknaha ana humo hi mykubyrisorokrẽtsa.

²⁵ Zikozo naha bara zuba taperyky. Iwatsahi makubyrisorokrẽtsa tu Deus isapyrẽnikia ty taperyky.

²⁶ Mypunihikbyitsa tu Deus hyrikoso mytsyhyryze ibo mynapamykysoko. Katsaktsa mypetu mysopykze:

— Hawa sa Deus bo tsimypamykysokonaha. Amy sa ibo tsimyzapykynaha. Yhỹ ja — tsimaha. Iwaze Deus hyrikoso mytsyhyryze ibo mopamykysoko, katsaktsa Deus bo mopamykysonaha humo batu myhyrinymyry ana hi Deus bo mopamykysoko. ²⁷ Deus koikny baktatu zinymyryba. Katsaktsa Deus hyrytsa tu ihyrikoso mytsyhyryze mopamykysoko. Mymykubyriry na humo kino inymyryba, amyty Deus mybo myzinyny tsihikik ihyrikoso tsihyrinymyrẽta. ²⁸ Amy skaraba mybo mykara ana humo hi Deus mymysapywyky, iwatatu batu imysapybara ty mykara ana humo kino Deus namysapywyky, katsaktsa Deus humo mymypokzitsirẽtsa hỹ. Tubabatu Deus nimywatawyhik iwaze isoho bo hyỹ tsimykarana. ²⁹ Deus nanabyi ty tysuknihabyize hawatsa ihyrytsa moziknaha ana humo botu zinymyryba. Atahi:

— Kytsa sizubarëtsa katse babata tukytsa moziknaha. Atahi taparakta. Asaktsa katse babata watsa moziknaha. Utakta kytsa sizubarëtsa iwata mozihikik — niy. Iwatsahi katsa ihyrytsa tsimoziknaha hỹ. Iwa nizihikik.

³⁰ Asaktsa sakzohotsa ihyrytsa bo nisiwatawy. Siwatawyhytsa pe:

— Kaokzeka wasani tsimaha. Katse babata watsa tsimoziknaha. Katuk ahawahi tsimynapykyryknaha — my. Iwatsahi amy skaraba mybo mykara, ana kino mymysapywyky ihumo wasani my hỹ.

Deus Sesus Kiristu humo tsimypokzitsiukrëta.

³¹ Niwazubakta! Iwa mytsaty tsimykaranaha Deus isapyrënikia ty tsizubarëna mybo nyny my. Iwatsahi hawa tsimytsasonaha. Deus zikwy hi mytuk mynapykyryk, iwatsahi aty zeka mymykniki Deus zikwy humo batu ziky.

³² Deus hi tatse babata mybo zipeha mybarawy bo inasik. Mysapyzeky nihyrikosokda. Kytsa Kiristu zibezenahaze Deus yhỹ zuba niy, iwatahi Kiristu myhumo sinini nikara. Iwa niyze isapyrënikia ty tsizubarëna mybo nyny mykara hỹ.

³³ Deus watawyhytsa soho:

— Ikiahatsa kaokzeka ahamysapyrëtsa — mykara. Iwatahi batu aty tohi iwatawyhytsa soho ba zikmysapybyiki. Deus zikwy humo siharere pyk niy.

³⁴ Batu aty tohi ba zikmyso:

— O ikiahatsaktsa ahamysapybyitsa tu tsikykaranaha ana humo hi tsimhyhyrikosokdanaha zeka wasani — my. Kiristu nawa mybo batu tyso. Atakta mysapyzeky nihyrikosokda,

iwatsahi mysapybyitsa tu tsikykaranaha ty batu tywabyzo hỹ. Deus zihyризikpowy iwaze ituk tawahi mynapykyryk. Myhumо tsiharereziurēta, Deus bo mytsyhyryze mynapamykysoikik, iwaze Kiristu myhumо tsimypokzitsiarēta hỹ. Iwatsahi batu aty tohi ahamysapybyitsa tu tsikykaranaha humо tsimyhyrikosokdanaha zeka wasani my.

³⁵ Kiristu mymysapywyikik hỹ. Amy skaraba mybo mykara Kiristu myhumо tsimypokzitsiukrēta. Tozeka ja kytsa Kiristu harere bo batu hỹ zikaha mymyitsapyriwynaha. Mymymyijaikiknaha. Sihumо sinini tsimykaranaha. Myraparētsa. Mynamybyikitsa. Asiba tsimyhyrikosokdanaha simypybytyrētsa pokso. Mymybanaha. Iwa mybo mykaranaha zeka iwatatu Kiristu myhumо tsimypokzitsiukrēta. Katsakta:

— O Kiristu myhumо tsimypokzitsiukrēta hỹ
— tsimykaranaha. Iwatsatu Deus tyryktsa sinini ziknakaranaha. ³⁶ Deus harere papeu humо botu ziwataha:

— O Deus pibytuhukutu kytsa sakyriukrēnikitsa
mymybakyzykynaha,
kytsa mymysukyryikiknaha.

Katsa hozipyrykzatsa watsa tsimaha.

Hawa kytsa hozipyrykzatsa mysibanahatsa
watsa kytsa mymybakyzykynaha.

Iwa mymysukyrykynaha — niy.

Ana kino botu ziwataha. Deus harere papeu humо ityryktsa soho ziwatahanaha.

³⁷ Amy skaraba namysapybyrikinahaze Deus hyrikoso humо mypunihikrētsa tsimoziknaha. Kiristu myhumо tsimypokzitsiukrēta iwatsahi

meky watu tsimoziknaha h̃y. Izikwy humo mypunihikr̃etsa tsimoziknaha.

³⁸ Deus mymysapywyky h̃y. Atahi myhumo tsimypokzitsiukr̃eta. Tsimyhyrizikosokzanaha zeka myhumo tsimypokzitsiukr̃eta. Myspituze myhumo tsimypokzitsiukr̃eta. Bijokpe iknyktsa sipehatsitsa abazubatsa sizubar̃etsa niwatihi bijokpe eze tu iwa Deus mymysapywyky ba zikpyk. Abaka amy ty mybo mykara byriri kino niwatihi amy ty mybo mykara, Deus mymysapywykik ba zikpyk. Deus tawahi mymysapywyky h̃y.

³⁹ Batu amy tohi mybarawy bijokpe ba mekytu ziky Deus zuba mymysapywykik ba zikpyk. Pihik humo kino niwatihi ba mekytu ziky Deus zuba mymysapywykik ba zikpyk. Deus tsizubar̃ena nizukni iwatahi batu amy tohi ba mekytu ziky Deus zuba mymysapywykik ba zikpyk. Deus myhumo tsimypokzitsiukr̃eta babata. Katsaktsa Sesus harere bo h̃ỹ tsimykaranahaze iwatahi mymysapywykik. Katsaktsa Sesus tuk estuba zuba wata iwaze Deus tatse bo iktsa mynakaraze katsa kino niwatihi mybo iktsa mynakara iwatahi mymysapywykik. Iwatahi batu amy tohi ba mekytu ziky Deus myhumo tsimypokzitsiukr̃eta ba zikpyk.

9

Deus myhumo tsimypokzitsiar̃eta ana tyhi katukytsa mysihyrinymyryky. Aba Sesus harere bo batu h̃ỹ nikaranaha.

¹⁻² Kyze utakta batu kaku. Katukytsa pokzi kasukatsihikr̃eta h̃ỹ. Sudeutsa humo mopuziuku

batu pyk iky. Wasani motsasoko. Sesus harere bo hyĩ mykara iwatahi batu mybarapetu kasopyk. Deus hyirikoso katuk mynapykyryk iwatahi batu kamyspihikbata. Iwatatu ahape:

— Sudeutsa humo kamypokzitsiarēta — my. Kaharere wasani mykara. ³ O katukytsa pahatsumuēhĩ tsihikik iwatahi Deus pe:

— O kazo katukytsa humo kamypokzitsiarēta sipokzi utakta Kiristu tuk batu mynapykyrykyzyky iwa zeka sisapyzeyky sinini mykara — my. Ana harere hi ba ziksitsumuēhĩ. ⁴⁻⁵ Katukytsa Sudeutsa taparakta Isareu tsekokatsa tsimaha. Tubabatu Deus taparaktsa mydiritsa nisiwatawy. Abarão iwaze itse Isake inarokota iwaze Sako Isake tse iwatsa nisiwatawy. Asakta ityryktsa niyziknaha. Sibo hi Deus tazikwy ziwatawy. Ispe niy:

— Isapyrēnikia ty ahabo nyny mykara. Ahahudikhudikwy ty ahabo nyny mykara. Ahatsekokatsa sizubarētsa mynaubaranaha — niy. Aiba zuba iharere mypehatsa Moises bo nitsasoko, iwaze hawa sisopyk mykaranaha sihyrinymyrētsa. Nawa Deus harere mysihyrinymyry mykaranaha zetu. Deus hi:

— Taparaktsa ahadiritsa Abarão, Isake, Sako iwatsa sihyrytsa ahatukytsa niyziknaha. Estuba zuba ahatsekokatsa tuk kapehata mozik, atahi kabo pahaoktyhyryk — niy. Kiristu Deus zipehata mybarawy bo inasikze Sudeu niyzik. Atakta imysapyrēnikita tu iwata humo hi katsa:

— O ikia zuba amyharerewabyrēnikita tsimaha hỹ. Ikia zuba tsamysapyrēta tsimykaranaha.

Ihumo kytsa sizubarëtsa Deus bo mykaranahak-tsa! “O Deus ikia zuba amysapyrënikita” — mykaranaha. Iwa Deus Sudeutsa nisiwatawy.

⁶ Hawa ha ty Deus nitsasoko atsa tu ty mykara. Iwatsahi batu tyso:

— Deus harere batu wasani. Sudeutsa sizubabyitsa zuba Deus harere bo hyÿ mykaranaha, iwatsahi Deus humo batu siwatahawyhy — iwa batu tyso. Taparakta Isareu tsekokatsa sizubarëtsa, Deus situk sizubabyitsa tu nisiwatawy ihyrytsa niyziknaha, ustsä kytsa kino niwatihi Deus nisiwatawy iwaze ihyrytsa niyziknaha. ⁷⁻⁹ Abarão mydiri itsekokatsa sizubarëtsa. Deus okzeka batu sizuba itsekokatsa babatsa zuba Deus tyryktsa niyziknaha. Deus okzeka asaktsa Isake humoktsa Abarão tsekokatsa babatsa zuba, Deus tyryktsa niyziknaha. Tapara Deus Abarão pe niy:

— Usta mytyktseheze aoke Sara tabykyhy aibaeze zuba atse mopuruk hÿ — niy. Iwa Deus Abarão pe niy, iharere wasani niy. Abarão tse nipuruk, iwatsahi Abarão tsekokatsa sizubarëtsa tuze sizubabyitsa zuba Deus nisiwatawy ihyrytsa niyziknaha.

¹⁰ Abarão tse Isake soho bo mytsaty tsimykaranaha. Deus Isake oke Hebeka bo nitsaso. Ana humo kino pahahyrinymyry Deus sizubabyitsa zuba nisiwatawy. Atatsa hi beketsa ty tabykyhyze iwaze beketsa nisipupuruk. Taparakta Isake hyrytsa niaha. Tapara nipurukta izo Esau zinaropyk, ibete tatu nipurukta izo Sako zinaropyk iwatsa. ¹¹⁻¹² Tapara beketsa nipupuruknahaze Deus tihi:

— Iykpykbyita humo kamypokzitsiarêta. Taparakta taypykze iykpykbyita batu iakzoho. Iykpykbyita tsyhyryze tarabaja my — niy. Iwa Deus niy. Tapara sipupurukbyize asahi naka tisapyrêna iwaze naka mysapybara ahabyitsa tu mykaranaha. Tapara sipupurukbyize tu Deus estuba ziwatawyhik, iwa nizihikik hỹ iwatahi iykpykbyita ziwatawy. Hawa nikaranaha ana humo hi batu ziwatawy, estuba zuba ziwatawy iwa nizihikik. ¹³ Deus harere papeu humo:

— Sako tsekokatsa nisiwatawy iky. Esau tsekokatsakta batu — niy. Iwatsahi Hebeka beketsa humo Deus soho tsinymyrykynaha.

¹⁴ Aty ja:

— Estuba zubata Deus ziwatawy iwa batu wasani my — maha. Nawa motsasokonahaze batu imysapy my. ¹⁵ Tubabatu Deus Moises pe niy:

— Aty humo zeka kamypokzitsiukrêta ata humo hi kamypokzitsiukrêta. Aty humo hi kamyze-hikik zeka ihumo kamypokzitsiarêta hỹ — niy. ¹⁶ Iwatahi amy ty sa tsimyzihikiknaha Deus batu ziky ana humo mymywatawy. Amy ty sa tsipis-apywykynaha Deus batu ziky ana humo mymy-watawy. Deus myhumo tsimypokzitsiukrêta iwa myzehikik. Hawa mozihihikik naha humo zuba nimysapywyky. Iwa hỹ. ¹⁷ Deus harere papeu humo iwatahaha, Deus Parao kytsa pehakatsa pe niy:

— Uta kahumo kytsa sipehatsa tsikyzyk. Kytsa sizubarêtsa tsiksipeha, kabo batu hỹ ziky. Kazikwy ty abo ziwatawy, iwatahi ikia humo kytsa sizubarêtsa kaso ho humo sihyrinymyrêtsa. Utakta abazubata hi ba hawa tohi ziksukninaha

ana ty hi zinymyrykynaha — niy. Iwa Deus harere papeu humo iwatahaha. ¹⁸ Iwatahi asaktsa Deus iakparawy sihumo tsimypokzitsiarêta. Asaktsa iharere bo batu hỹ zikaha. Iwatsa batu ma zikaha.

Hawa Deus tatyryktsa tuk nikara.

¹⁹ Deus nawa zeka aty ja kape my:

— Aty Deus harere bo yhỹ ahabyizeka iwaze Deus sinini ykarawy bo myzipaha zeka batu wasani my. Deus mozihihikik ba hawa tohi zikaha tu atakta sinini ykarawy bo myzipaha zeka batu wasani my — tsimy.

²⁰ — O kaharereziuwu iwa Deus bo batu tyso. Apetu ja asopyk. “Utakta myhyrizikwanita tuze iwaze Deus pisapybyiki.” Iwa batu tyso. Katsaktsa morosuk watsa batu ipokzitsi. Morosuk mozukni nahaze batu harere zeky “Iwa tsimyzuknikize batu wasani my” my. Iwa morosuk tsihitsa bo batu tyso my. Katsa kino niwatihi Deus pe iwa batu wasani my — iwa batu tyso.

²¹ — Aty zeka morosuk mozuknize hawa mozihihikik nahawa mozokniki. Aitsekeni tsizubarêna zeka petok morosuktsa mysisukni. Estuba tisapyrêta mozik ustakta isapybyita eze natapatsikik tawahoro eze zuba mynakara.

²²⁻²⁴ Hawa Deus niy morosuk tsihitsa wata Deus Sudeutsa humo tsimypokzitsiarêta. Asaktsa iharere bo batu hỹ mykaranaha tazikwy ziwatawy. Asaktsa iharere bo batu hỹ mykaranaha iwatahi taokaniki. Ba zik tatsapusare, asaktsa iharere bo batu hỹ mykaranahaze ba zik simyitsapyriwy. Tsiakubyrisorokrêta ustsya kytsa kino nisiwatawy. Iwa myze Sudeutsa asaktsa

iharere bo batu hỹ mykaranaha ba zik simy-itsapyriwy. Katsaktsa ihyrytsa tsimoziknaha, asaktsa nisiwatawy. Wastuhu Sudeutsa ahamys-apyrẽtsa tsimoziknaha ana humo hi nimywatawy. Utsa Sudeutsabyitsa kytsa sizubarẽtsa ihyrytsa tsimoziknaha, sizubarẽtsa nisiwatawy. — Deus tapetu nikara:

— Asaktsa katse babata harere bo hyỹ mykaranaha iwata simysapyrẽtsa moziknaha. Asahi: “O Deus myzo ikia zuba amysapyrẽnikita, ikia zuba apunihikrẽnikita” maha. Iwa kabo mosakibazikiknaha — niy. Iwa sihumo tsimypokzitsiarẽta hỹ. ²⁵ Tubabatu Hosea Deus sohokotsa Deus harere papeu humo ziwatahaka:

— Taparaka asaktsa kahyrytsabyitsa tu
abaka mysipeha “O katyryktsa tsimaha” pa-
hawatawy iwatsahi katyryktsa tsimozik-
naha.

Tapara asa humo batu kakparawy abaka ispe my:
“Ahahumo kamypokzitsiukrẽta” my — niy.

²⁶ Haneze Deus tihi:

— Ikiahatsa katyrytsabyitsa tsimaha.

Kyze anaeze ispe sopyk: “kahyrytsa tsimaha”
my.

Deus koikny baktatu asahi kahyrytsa tsimozik-
naha — niy.

Iwa botu Hosea ziwatahaka. Sudeutsabyitsa soho,
hawa asa kino niwatihi Deus hyrytsa moziknaha.

²⁷⁻²⁸ Isaijas Deus sohokotsa niwatihi nikara
Deus harere papeu humo botu ziwatahaka:

— Taparakta Isareu tsekokatsa sizubarẽtsa nio-
baranaha
nimyra watsa maha.

Deus situk sizubabyitsa tu mysiwatawy.

Sizubarētsa asaktsa Deus harere bo batu
hỹ zikaha mybarawy eze mysimyitsapyri-
wyky.

Batu imysapy tsimykaranaha zeka pahasininiwy
— niy.

Nawa botu nitsaso atsa tu mykara. ²⁹ Tubabatu
taparakta Isaijas Deus harere papeu humo zi-
watahaka:

— Deus mybarawytsa ba hawa tohi zikzukninaha.
Wastuhu mytukytsa nitarenaha niwa
byizeka,

katsaktsa Sodoma ezektsa watsa,
asahi tahamysapybara humo niakbabaik-
naha

katsa kino niwatihi tsimokbanahatsa.

Komora ezektsa watsa niwatihi tsimokbana-
hatsa.

Sudeutsa batu sizuba Deus bo mysioktyhyryk —
niy.

Iwa Deus harere papeu humo botu ziwataha.

*Deus wasania ty bo Sudeutsa batu hỹ
nikaranaha.*

³⁰ Sudeutsabyitsa batu tahapetu sisopyk:

— Amy ty tsimykaranaha iwatsa tu Deus okzeka
mysapyrētsa tsimoziknaha — iwa batu tyso. Asak-
tsa Sesus harere bo hỹ mykaranaha ana humo hi
Deus tihi:

— Kaokzeka wasani tsimaha katse harere bo
hỹ tsimykaranaha iwatsahi ahaspirikporētsa
tsimypykyryknaha — niy. ³¹ Sudeutsa tihi:

— O katsaktsa Deus sopykwy ty tsimykaranaha iwatahi Deus mymypeha: “Ikiahatsa ahamysapyrētsa” my — mytsaty ahabyitsa nikaranaha. Deus sisoho:

— Ikiahatsa ahamysapyrētsa — iwa batu tyso. Niwazuba iharere bo zuba batu hỹ zikaha, iwatsahi Deus harere bo batu hỹ mahaze Deus okzeka batu wasani zikaha. ³² Deus harere bo batu hỹ mahaze hawa wasani mykaranaha ana humo hi tapetu sisopyk Deus mype niy:

— O kaokzeka ahamysapyrētsa — iwa mytsaty ahabyitsa nikaranaha. Deus okzeka ata harere bo hi hỹ mykaranaha ana kino aba zuba my. Sesus Kiristu harere bo batu hỹ mahaze iwatahi Deus ispe my:

— Kaokzeka batu ahamysapy — niy. ³³ Iwatahi Deus harere papeu humo:

— O kytsa mytsatyziutahaktsa! Harahare wataty zik icy.

Ata humo hi Sudeutsa inarahanaha.

Kiristu hi harahare wata, asaktsa iharere bo hỹ mykaranaha batu sisikpyby

tahawahi Deus tuk mynapykyryknaha — niy.

Deus harere papeu humo niy.

— Asaktsa Sesus Kiristu harere bo batu hỹ maha asaktsa kytsa watsa asahi harahare bete inarahanaha.

Iwatsahi Sudeutsa Sesus Kiristu harere bo batu hỹ mykaranahaze

Kiristu sihumo harahare wata mozik,
iharere bo batu hỹ zikaha iharere batu siakparawy

iwatsahi kytsa watsa harahare bete inarahana
Iwa Deus harere papeu humo niy, hawa Sudeutsa
sizubabyitsa Deus hyrytsa moziknaha.

10

¹ O kytsa! Deus katukytsa sihumo kamy-pokzitsiarêta mysitsumuêhĩ tsihikik. Deus bo mopamykysoikik:

— O myzo katukytsa tysitsumuêhĩkĩkta! Tys-ioktyhyk — my. ² Deus mozihikik ana humo hi pitsihikiknaha zuba batu zikaha. Sispirikpobyitsa tuze Deus okzeka wasani ha humo batu sihyrinymyry. ³ Hawa mytsaty mykaranaha ana humo ka nikaranaha. Ana ty hi Deus okzeka wasani ja mykaranaha iwa tahapetu sisopyk. Sispirikpobyitsa tu paikpa mytsaty wasani ja mynakaranaha iwatsa tu mybarapetu sisopyk. Sesus harere bo hyỹ tsimykaranaha zeka iwatsahi Deus okzeka mysapyrêtsa tsmoziknaha ana ty hi batu hỹ zikaha.

⁴ Kiristu zumuze Deus harere ibyky ana hi Moises ziwataha nepykbaik. Abaka Kiristu harere bo hyỹ tsimykaranaha zeka iwaze Deus okze mysapyrêtsa tsmoziknaha. Ana humo hi Sudeutsa batu hỹ zikaha.

Deus myzubarêtsa nimywatawy iwatahi Sesus ibo mysioktyhyryk tsihikik.

⁵ Tubabatu Moises ziwatahaka, kytsa soho asahi isopykwy bo hyỹ nikaranaha. Asa soho ziwatahaze:

— Ikiahatsa Deus harere ibyky Moises ziwataha tsizubarêna bo hyỹ tsimykaranaha zeka iwaze

Deus okze ka wasani tsimyzurukunaha, ahawahi ituk tsimynapykyryknaha. Iharere humo estuba zuba yhỹ ahabyi zeka batu wasani tsimyzurukunaha iwatsahi Deus tuk ba ziknapykyryk. Iwa Moises sopykwy bo yhỹ batu zikaha — niy. ⁶ Deus hi:

— Sesus Kiristu harere bo hỹ tsimykaranaha zeka ahamysapyrẽtsa tsimoziknaha iwa kaokze ka wasani tsimaha — niy. Wastuhu ahaturtsa:

— Batu zikaha! Batu aty tohi bijoikpe bo iwaze Kiristu ba zikziokty. ⁷ Batu aty tohi siakbatsa sapy bo iwaze Kiristu mybarawy bo ba zikzioktyhyryk. Katsa iwa batu zikaha.

Kiristu botu mybarawy bo inasik, mysapyzeky botu nihyrikosokda. Atahi mytuk mynapykyryk. ⁸ Deus harere papeu humo botu ziwatahaka:

— Kaharere bo hỹ tsimykaranaha zeka kaokzeka ahamysapyrẽtsa tsimoziknaha. — Anaharere humo kino:

— Kaharere bo hỹ tynakaranahaktsa! Ana kino botu tsiwabynaha. Ana humo kino botu mytsaty tsikykaranaha — niy. Iwaze ahabo tihi:

— Kiristu harere bo hỹ tahaktsa! — my. Kaharere awa tu ahabo motsasokozo. ⁹ Kytsa aparakbaha bo ikiahatsa tihi:

— Sesus Kiristu mypehakatsa — tsimaha. Ana harere tsimytsasokonaha zeka Deus pahabete-saka. Deus Kiristu zihyrizikpowy ata harere bo hỹ tsimaha zeka Deus pahabetesaka hỹ, iwa Deus bo pahaoktyhyryk. ¹⁰ Katsaktsa Sesus harere bo hỹ tsimykaranahaze Deus mype niy:

— Kaokze ka Kiristu humo ahamysapyrẽtsa tsimoziknaha — my. Tsimytsasokonaha zeka

Sesus Kiristu mypehakatsa my iwazeka Deus mo-betesaka, mymysapyrëtsa tsimoziknaha. ¹¹ Deus harere papeu humo iwatahaha:

— Aty zeka Sesus harere bo hyÿ mykara atakta batu sikpyby ihumo tispirikporëta mozik — niy. ¹² Kytsa sizubarëtsa iharere bo hyÿ mykaranaha tsahi batu sisikpyby. Sudeutsa Sudeutsabyitsa kino niwatihi asaktsa Deus okzeka astsabani maha. Sizubarëtsa Sesus humo sispirikporëtsa moziknaha. Asahi:

— Ikia zuba mypehakatsa — mykaranaha. ¹³ Deus harere papeu humo iwatahaha:

— Aty zeka Deus bo myzapykyky zeka: “O tsipiktsumuëhĩ” atahi Deus piwaby tahi pioktyhyryk, kytsa sizubarëtsa Deus bo mysioktyhyryk — niy.

¹⁴ Iharere mywaby byizeka batu Deus pe:

— O tsipiktsumuëhĩ — Deus wasania ty tywaby ahabyizeka batu iharere bo yhÿ tsikaha. Ustakta Deus wasania ty tyso byizeka ba ziwabynaha. ¹⁵ Deus ykzohotsa sipeha ahabyizeka iharere ba ziktsasonaha. Deus harere papeu humo iwatahaha:

— Deus ykzohotsa humo mozumukunaha, iwaze wasania ty motsasokonaha ana humo hi mykurëtsa hÿ — niy.

¹⁶ Iwaze — Deus wasania ty nitsasokonahaze sizubabyitsa tu iharere bo hyÿ — nikaranaha. Iwa tubabatu Deus sohokotsa Isaijas botu ziwatahaka. ¹⁷ Kytsa Deus wasania ty piwabykynahaze iwaze zuba asaktsa iharere bo hyÿ mykaranaha. Iwaze ana harere humo sispirikporëtsa moziknaha. Kiristu soho piwabykynahaze iharere bo

hyỹ mykaranaha iwatsahi ihumo sispirikporẽtsa moziknaha.

¹⁸ Kyze aty zeka:

— Sudeutsa Sesus harere bo batu hỹ mykaranaha. Tozeka ja Deus wasania ty batu waby. Batu ba, Deus wasania ty ziwabykynaha hỹ. Deus harere papeu humo iwatahaha:

Nanabyitaba kytsa sizubarẽtsa Deus soho humo sihyrinymyrẽtsa niapykyryknaha.

Mybarawy ezektsa sizubarẽtsa
hudikhudikwy ezektsa iwatsa siharere
ziwabynaha — niy.

Iwa Deus harere papeu humo iwatahaha.

¹⁹ Aty zeka ja:

— Isareu tryryktsa sihyrinymyrybyitsa watsa — my. Batu ba. Sihyrinymyrẽtsa hi. Kiristu soho sihumo batu ihokdaha. Taparakta Moises Deus tsyhyryze tihi:

— Ikiahatsa Sudeutsa tsimaha.

Deus ustsá kytsa mysiwatawyze sihumo aha-
zokdiharẽtsa tsimoziknaha.

“Katsa zuba Deus hyrytsa” tsimykaranaha paikpa
mytsaty tsimykaranaha

iwatsahi Sudeutsabyitsa asaktsa
sihyrinymyrybyitsa tu mysiwatawyze

iwaze sihumo ahazokdiharẽtsa tsimoziknaha —
niy.

Iwa Deus harere papeu humo botu iwatahaha.

²⁰ Taparakta Isaijas Deus sohokotsa isikpybyby-
itatu Deus tsyhyryze:

— Asaktsa katy beri ahabyitsa iwatahi sibo ka-
hazuba iky,

asaktsa batu katy sapyky ahabyitsa tu sibo
utatu ikwatawy — niy.
Iwa tubabatu taparakta Isaijas ziwatahaka.
²¹ Isaijas Sudeutsa soho kino niwatihi ziwata-
haka Deus tsyhyryze tihi:
— Pibytuhukunaha tu kaharere bo hyŷ tsimahak-
tsa kytsa! mykara.
Ikiahatsa batu. Kaharere bo batu yhyŷ
tsikykaranaha — niy.
Iwa Isaijas niy.

11

*Deus tatyryktsa Sudeutsa humo tsimypokzit-
siarēta.*

¹ Iwaze hawa skaraba my:
— Deus tatyryktsa Sudeutsa nisimoewy ja —
my. Batu ba. Deus tatyryktsa Sudeutsa ba zik-
simoewy. Uta hiba Isareu ezekta tu. Taparakta
Abarão kadiri, utakta Bēsami tukytsa iknyta. Deus
ba zikmoewy. ² Deus isuknihyize Sudeutsa
nisiwatawy iwatahi tatyryktsa ba ziksimoewy.
Taparakta Erias Sudeutsa soho Deus bo zisapy-
byriki, ana harere Deus papeu humo ziwatahaka
ana humo tsikspiriktsokdanaha ja. ³ Deus so-
hokotsa Erias tihi:
— “O Deus sohokotsa nisibabaiknaha. Asapy
haneze siraratsa wezowytsa zipaparabaiknaha
hana bo ja isapy zuba. Uta zuba iktare. Asahi pik-
beze tsihikiknaha” mytsaty ahabyitatu ikykara —
niy. ⁴ Hawa Deus Erias pe niy:
— O batu, ikia zuba kaharere bo hyŷ
tsimykara batu ba. Kytsa sizubarētsa sete miutsa
sipunihikrētsa asa kino niwatihi deusbyitsa Bara

inarokota iharere bo batu hỹ nikaranaha. Asahi kaharere bo hỹ mykaranaha. Utsa kytsa zuba Bara ikia deus my mytsaty ahabyitsa nikaranaha — niy. Iwa Deus Erias pe niy.

⁵ Abaka Sudeutsa wastuhu kytsa Sesus harere bo hỹ mykaranaha. Tubabatu Erias okze tuze wastuhu kytsa Deus harere bo hỹ nikaranaha aba kino niwatihi Deus Isareu tsekokatsa nisiwatawy, sihumo tsimypokzitsiukrēta iwatahi nisiwatawy. ⁶ Asaktsa taparaktsa sopykwy bo yhỹ nikaranaha iwaha humo Deus batu isty watawy. Moises harere bo yhỹ nikaranaha iwa zikzurukunaha ana humo hi batu isty watawy. Batu ba. Sihumo tsimypokzitsiarēta ana humo hi nisiwatawy. Deus nisiwatawy zeka taparaktsa sopykwy humo zuba zikzurukunaha, iwa zeka sihumo batu imypokzitsi.

⁷ Niwazuba amy ty Isareu ezektsa ziberikinahaze ana hi batu ity kaha. Deus okzeka simysapyrētsa niyzik tsihikiknaha batu simysapybyitsa tu nikaranaha. Batu sizuba Deus okzeka simysapyrētsa niyziknaha asaktsa botu nisiwatawy. Hawa Deus okzeka kytsa simysapyrētsa moziknaha ana hi wastuhu Isareu ezektsa piwaby tsihikiknaha. Utsaktsa Sesus harere humo batu sispirikpo iharere bo batu hỹ zikaha. Iwaze Deus tihi:

— Ikiahatsa kaharere bo batu hỹ tsimykaranaha — niy. ⁸ Deus harere papeu humo sisoho ziwatahaka:

— Deus harere ziwabynahaze sibo tsihokdahrēna.

Simytsatyhybyitsa tu iharere humo batu sihyrinymyry.

Aba kino atsawatu iharere batu siwabyziu — niy.

⁹ Taparakta Dawi niwatihi Deus harere papeu humo sisoho ziwatahaka:

— Asaktsa tahapetu sisopyk mybarapetu mykaranaha.

Simyspihikbatanikitsa Deus mysizukutu iwaze wasani my.

Tahamyikaha burukze mahape myijaikiknaha mybarapetu mykaranaha.

Hawa sasabyitsa tahawerekywy bo myna-pupunahaze tawata tahamyikaha pimyikinaha.

¹⁰ Sihyrizikubyitsa watsa mozurukunaha.

Deus batu mynyhy mykaranaha.

Asaktsa maku wata titsakyrikrêta piskyrik eze tawata mozurukunaha.

Deus mysitsumuêhĩ tsihikik asaktsa ipe: “O batu hỹ” mykaranaha

Iwa Deus harere papeu humo ziwatahaka.

¹¹ Iwaze Sudeutsa zimyikinahaze simysapybyitsa tu nikaranahaze jokboha zuba zimyikinaha. Sudeutsa mytsatyspyk mykaranaha. Sudeutsa Deus harere bo batu hỹ nikaranahaze iwaze Deus Sudeutsabyitsa nisibetesaka. Sudeutsabyitsa Deus bo mysioktyhyrykze Sudeutsa sihumo sizokdirêtsa niyziknaha. Abaka Sudeutsabyitsa Deus bo mysioktyhyryk ana humo hi sozeka ja Sudeutsa tihi:

— Katsa tihiktsa kytsa! Katsaktsa Deus bo tymyoktyhyryknahaktsa! Sudeutsabyitsa watsa — mykaranaha.

¹² Sudeutsa Sesus harere bo batu hỹ nikaranahaze Deus Sudeutsabyitsa tabo mysioktyhyryk. Sudeutsa iharere bo batu hỹ mykaranaha. Iwat-sahi Sudeutsabyitsa iharere bo hyỹ mykaranaha ihumo sispirikporëtsa moziknaha. Deus nisis-apywky aiba zuba Sudeutsa Sesus harere bo hyỹ mykaranahaze Deus isapyrënikia ty myzubatsa bo nyny my hỹ.

Sesus Kiristu Sudeutsabyitsa Deus bo mysioktyhyryk.

¹³ Abaka Sudeutsabyitsa zuba motsasoko. Deus zikpeha my. Wasaniha ty ahabo motsasoko ana humo hi zikpeha. Kahyrikosokzawy humo kakurëta mynapykyryk.

¹⁴ — Tozeka ja kahyrikosokzawy humo katukytsa Sudeutsa ahahumo sizokdirëtsa moziknaha iwaze situk wastuhu kytsa Deus bo mysioktyhyryk. Tozeka ja ikiahatsa bo iktsa mahaze “O katsaktsa niwatihiktsa” — maha ¹⁵ Sudeutsa Sesus harere bo batu hỹ nikaranahaze sizubarëtsa Sudeutsabyitsa humo ka wasani niy. Sudeutsabyitsa Deus harereziuwyttsa niyziknaha. Deus Sudeutsa mysiwatawyzoze kytsa sizubarëtsa bo tisapyrëna hỹ. Sudeutsa iharere bo hyỹ mykaranahaze myzubatsa humo tisapyrëna. Sizubarëtsa bo pisapywyky hỹ. Aty zeka inahyrikpo zeka tisapyrëna my nawata, Deus myzubatsa mysisapywyky hỹ.

¹⁶ Atsikara estuba zuba Deus bo nyny my zeka nitare naha kino niwatihi wasani. Hwiharatatsa

sisapyrëtsa zeka isarapatsa kino niwatihi sisapyrëtsa anahumo hi ahahyrinymyrëtsa. Taparak-tsa Deus harere bo hyÿ nikaranaha sihumo tsimypokzitsiukrëta. Aba kino niwatihi kytsa iharere bo hyÿ mykaranaha sihumo tsimypokzitsiukrëta hÿ.

¹⁷ Oriwereja soho bo mytsaty tsimaha, ihumo tsinymyrykynaha. Oriwereja wastuhu sarapatsa niakarakhaha. Kyze hwisarapatsa jakara iknykta mekta sarapa tu tasutsuk tsikykaranaha, aibani zuba tahaypyknaha. Iwata Sudeutsa hwisarapatsa watsa asaktsa sikakareheta niaha. Sesus harere bo batu hÿ mykaranahaze tu Deus hyrytsa batu zikyziknaha iwatsahi metutu tahasapynaha. Ikiahatsa Sudeutsabyitsa tu Sesus harere bo hyÿ tsimykaranahaze iwatsahi ihumo ahaspirikporëtsa tsimoziknaha, iwatsahi ikiahatsa hwisarapatsa watsa asaktsa jakara iknykta hwi humo nezutsukuk niy. ¹⁸ Iharatatsa humo hwi taypyk. Batu sarapatsa humo hwi taypyk. Iwatsahi pykyhytutaha nawa tsimytasokonaha. Batu tyso.

— O Deus Sudeutsa batu iakparawy iwatahi katsa zuba tsikmywatawy — iwa batu tyso.

¹⁹ Ikiahatsa:

— Hawa katsa hwisarapatsa jakara iknykta hwi humo nezutsuk tsimaha, Deus Sudeutsa sapy mybo nyny mykara — tsimaha. ²⁰ Wasape tsimytasokonaha wasape my. Sudeutsa hwisarapatsa sikakareheta watsa Sesus harere bo batu hÿ zikaha. Ikiahatsa hi sisapy tsiapiaksenaha. Sesus harere bo hyÿ tsimykaranahaze ana humo hi sis-

apy tsipiaksenaha. Pykyhytutaha kytsa! Batu tyso:

— Katsa zuba Deus hyrytsa tsimaha — iwa batu tyso. Pykyhytutaha! Sesus harere bo zuba hyỹ tsimykarannahaktsa batu pyk zikaha! ²¹ Sudeutsa Sesus harere bo batu yhyỹ mykarannahaze iwatahi Deus metutu nisisapyspyk niy. Hwisarapatsa sikakarehetsa watsa. Iwatuze Sudeutsa hwisarapatsa babatsa watsa. Ikiahatsa ja. Ikiahatsa iharere bo yhyỹ ahabyizeka pahatyryktsapyriwy. ²² Iwaze tsiwabytoktonaha! Sudeutsa Sesus harere bo batu hyỹ mykarannaha iwaze Deus nistryryktsapyriwyky. Katsa tihi:

— O hawa Deus mykara wasani my — tsimaha. Deus Sudeutsabyitsa Sesus harere bo hyỹ mykarannahaze tu asa humo tsimypokzitsiukrēta hyỹ. Katsa tihi:

— O hawa Deus mykara wasani my — tsimaha. O kytsa pykyhytutaha! Sesus harere bo yhyỹ ahabyizeka ikiahatsa hwisarapatsa watsa tsimoziknaha, asaktsa sikakarehetsa watsa niaha. ²³ Sudeutsa Sesus harere bo batu hyỹ niahaze hwisarapatsa watsa niyziknaha asaktsa sikakarehetsa hyỹ niaha. Aiba zuba Sesus harere bo hyỹ mykarannaha iwatsahi ihumo sispirikporētsa moziknaha iwaze Deus hyrytsa mozikzonaha. Ana kino Deus zikwy humo batu ihokdaha.

²⁴ Iwaze ikiahatsa Sudeutsabyitsa hwisarapatsa watsa jakara iknykta niaha, iwaze oriwereja hwi humo nezutsuk niy. Tapara ikiahatsa Deus hyrytsa yrik ahabyize. Abaka iharere bo hyỹ tsimykarannaha tsahi ihyrytsa tsimoziknaha.

Sudeutsa iharere bo hyĩ maha zeka ihyrytsa mozikzonaha. Hawa hwisarapatsa hwi humo nezutsukze, Sudeutsa oriwereja sarapatsa watsa Deus hyrytsa mozikzonaha. Iharere bo hyĩ maha zeka ihyrytsa mozikzonaha. Ana kino Deus zikwy humo batu ihokdaha.

Deus myzubatsa humo mysisapywyky.

²⁵ O katukytsa pahahyrinymyry tsihikik Sudeutsa Kiristu harere bo batu hĩ mahaze tahaoktsĩspyknaha maha. Asaktsa Deus bo batu tyso mynakaranaha:

— O katsaktsa Sesus Kiristu harere bo batu hĩ tsimaha iwa batu hĩ tsimaha — maha. Iwa tawahi batu tyso.

— Deus ustsá kytsa Sudeutsabyitsa nisiwatawy. Asaktsa Deus bo mysiockyhyryknaha Sudeutsa Sesus harere bo batu hĩ zikaha. Iwa tubabatu Deus nizihikik. Ana humo hi batu myhyrinymyry. Hawa Sudeutsa Sesus harere bo hyĩ mykaranaha batu myhyrinymyry. Abaka ahabo motsasoko iki-ahatsa “O katsa zuba Deus nimywatawy ihyrytsa tsimoziknaha” — iwa batu tyso. Katukytsa mypehawy mytsaty mytsaty tsimahaktsa! ²⁶ Sudeutsa sizubarẽtsa Deus bo mysiockyhyryk. Tubabatu Deus harere papeu humo ziwatahaka:

— Mymyoktyhyrykta Siã ezekta.

Sako tsekokatsa Sudeutsa simysapybyitsa tu nikaranahaze nisiokzohik ispiriktsokdata wata.

²⁷ Simysapybyitsa tu nikaranaha Deus nisiokzoba. Hawa Deus botu nitsasoko atsatu mykara — niy.

Iwa Deus harere papeu humo botu ziwatahaka.

²⁸ Aba Sudeutsa Kiristu harere bo batu hỹ maha iwaze Deus sukyrytsitsa niyziknaha. Wasaniha ty batu hỹspyk nikaranaha. Ana ty hi Sudeutsabyitsa mysitsumuẽhĩ. Ana humo hi Sesus Kiristu harere bo hyỹ tsimykaranaha iwatsatu Sudeutsabyitsa tsimaha. Tapara Deus Sudeutsa nisiwatawy ihyrytsa niyziknaha. Taparaktsa Sudeutsa Abarão, Isake, Sako iwatsa ispe niy:

— Ikiahatsa kahyrytsa tsimaha — niy. Iwatsahi Sudeutsa Deus harereziuw, sihumo tsimypokzitsiukrẽta hỹ. ²⁹ Iwatahi Deus ba meky watu ziksisapywy ba paikpa mytsaty ziky. Mytsaty mynakara tasopyk ty zuba mynakara. Tapetu isopykze:

— Asaktsa nisiwatawy, iwatahi mysisapywyky — my. Iwaze asaktsa nisiwatawy iwatahi mysisapywyky hỹ. ³⁰ Iwatahi Deus ahahumo tsimypokzitsiarẽta. Taparaka ikiahatsa iharere bo batu hỹ tsikykaranaha abaka batu. Abaka iharere bo hyỹ tsimykaranaha Sudeutsa iharere bo batu hỹ niaha, ana humo hi Deus ahahumo tsimypokzitsiarẽta. ³¹ Aiba zuba Deus sihumo tsimypokzitsiarẽta aha watsa. Abaka Kiristu harere bo batu hỹ maha byri zuba niaha, iwatahi Deus sihumo tsimypokzitsiarẽta.

³² Sudeutsa Sudeutsabyitsa kino niwatihi Deus okzeka sizubarẽtsa iharere bo batu hỹ zikaha. Iwahatuze Deus sizubarẽtsa humo tsimypokzitsiarẽta, Sudeutsa Sudeutsabyitsa humo kino niwatihi, nawatsa tu myzubahatsa humo tsimypokzitsiarẽta mopykyryk.

Deus bo tsimysakibazikiknahaktsa.

33 O Deus bo tsimysakibazikiknahaktsa! Ipe tsimahaktsa!

— Ikia zuba amysapyrēnikita. Ikia zubata tsamyhyrizikwyrēta. Batu amy tohi ahumo ihok-daha. Tsinymyryba. Hawa mytsaty tsimy kara katsaktsa batu myhyrinymyry. Hawa tsimyzuruku katsaktsa batu myhyrinymyry ikia zuba ahyrinymyrēta babata — tsimaha. 34 Deus harere papeu humo botu ziwatahaka:

— Batu aty tohi Deus bo zipeha my.

Hawa Deus mytsaty mynakara batu aty tohi zikmyhyrinymyry.

35 Batu amy tohi Deus bo nyny zikaha.

Batu aty tohi isapyrēnikia ty ibo nynspsyk myze ba zikzihuak.

Tsizubarēna ituk — niy.

Iwa Deus harere papeu humo ziwatahaka.

36 Deus koikny baktatu tsizubarēna nizukni. Usa bo mytsaty niy ana hi nizukni. Iwatsahi mybarawy tsizubarēna kytsa myzubatsa kino niwatihi ipe mykaranaha:

— Ikia zuba wasani tsimy kara, ikia zuba tsamyhyrizikwyrēta — maha. Katsa niwatihi ibo tsimysakibazikiknaha!

— O ikia zuba amysapyrēnikita. Ikia apunihikrēnikita. Ba hawa tohi zikzukninaha. Myokzeka ikia tsamyharerewabyrēta hỹ — tsimaha. Iwa hỹ.

12

Deus tsyhyryze hyrizikosokdawy tsimykaranahaze mykurētsa tsimoziknaha.

¹ Iwatsahi katukytsa Deus tawahi mytuk mynapykyryk mymysapywyikik iwaze — ikia zuba mypehakatsa — ipe tsimahaktsa! Amy ty sa mozihihikik ikiahatsa tihi:

— Katsaktsa anatyhi tsimykaranaha, aharere bo zuba hyĩ tsimyzihikiknaha hyĩ — tsimaha. Iwa tsimyzurukunaha zeka ahakurētsa tsimoziknaha. Iwaze wasani tsimykaranaha.

² Mybarawy ezektsa sopyk tsimoewybaiknahaktsa! Hawa mytsaty tsimykaranaha Deus mekywaha tu mozihihikik. Iwaze hawa Deus mozihihikik tsipinymyrykynaha. Nawa wasani tsimykaranaha. Nawa tisapyrēnikia ty tsipinymyrykynaha. Hawa Deus okzeka tsimyzurukunaha ana humo hi tsipinymyrykynaha, hawa Deus mozihihikik ana humo hi ahahyrinymyrētsa tsimoziknaha.

³ Deus zikwy botu katuk mynapykyryk ihyrizik-tsokzawy humo. Ana tarabajawy humo hi wasania ty motsasokoro. Ana humo hi ahape:

— Ahatuk batu tyso “utakta abazubata” — iwa batu tyso. Ahasoho bo mytsatzyiutaha! Amy ty ihokdaha byizeka anaty kino tsimahaktsa! Tarabajaziu tahaktsa. Deus hi ahyriziktsokzawy humo zahapeha. Amy skaraba ahatarabajawy Deus pahapeha, ana bo hi tsimahaktsa kytsa!

⁴ Katsaktsa mynury nanabyi meky watu, mytsyhyrypetsa, mypyrytsa, myhyriziktsa, myhyrytsa iwatsa tsizubarēna tsimaha. ⁵ Iwata katsaktsa Sesus harere bo hyĩ tsimykaranaha inury wata tsimoziknaha. Katsaktsa myzubarētsa tsimaha, hawa ha tsimyzihikiknaha estuba zubata watsa atsatu mytsaty tsimykaranaha.

Amy ty Kiristu mozihihik ana humo hi tsimynakaranaha. Estuba estuba zuba tahahyritzitsokzawy humo mynakaranaha katsakta tsinaharapetsumuēhĩkĩnaha hỹ.

⁶ Deus myhumo tsimypokzitsiarēta isapyrēnikia ty mybo nyny mynakara. Ihyriziktsokzawy humo izikwy mytuk mynapykyryk. Iwatsahi estuba estuba zuba izikwy mymypehaka ana humo kino tsimahakta! Wastuhutsa izikwy ty mynapykyrykze Deus wasania ty motsasoziukunaha. Asakta wasania ty tytsasokonaha za.

⁷ Utsa izikwy situk mynapykyryk iwatsahi Sesus tuktsa bo mysitsumuēhĩkĩ iwaze asakta Sesus harere bo hyỹ mykaranaha, asa bo hi tysitsumuēhĩkĩnaha. Utsa izikwy situk mynapykyryk iwatsahi Sesus tuktsa mysihyrinymyrynaha. Iwaze asakta Sesus humo sispirikporētsa. Asa bo hi tysihyrynymyrynaha.

⁸ Utsa izikwy situk mynapykyryk iwatsahi sipehawy kytsa bo mynasiakuwyky. Asakta sipehawy tytsasokonaha. Utsa izikwy situk mynapykyryk iwatsahi sinamyrētsa moziknaha batu taha bo zuba mykaranaha, asakta Deus zikwy humo sinamybyitsa bo nyny mykaranaha. Utsa izikwy situk mynapykyryk iwatsahi kytsa humo mysipokzitsikinaha, iwaze asakta usts a kytsa humo tysipokzitsikinaha. Utsa simypokzitsiukbyitsa bo mysitsumuēhĩkĩnaha iwatsahi asakta sakurētsa Deus zikwy humo wasani mykaranaha.

⁹ Tyharape pokzitsikinahakta! Iwa tsimykaranaha zeka ba zikmyspihikbata.

Isapyrēnikia ty ahakparawy! Ahasopyksapybyri
tsimoewybaiknahaktsa! ¹⁰ Ikiahatsa Sesus
humo ahatukytsa tsimaha. Iwatsahi tyharape
pokzitsikinahaktsa! Ahawahoro eze ktsa
watsa humo ahamypokzitsirētsa. Tyharape
pokzitsinahaktsa. Iktsazubataha tsimahaktsa!
¹¹ Deus harere bo yhỹ tahaktsa! Ihyriziktsokzawy
humo tsimykaranaha. Ahazikara byihu ja.
Ahakurētsa tu Deus harere bo yhỹtahaktsa!

¹² Kiristu taperyky iwatsahi ahakurētsaktsa!
Utsa kytsa pahaknikinahaze ahapuni-
hikrētsaktsa! Deus bo typamykysoikiknahaktsa!
¹³ Utsa kytsa Sesus harere bo hỹ mykaranaha
batu sinamyky ahanamy ty sibo tsibiaknaha
nyny nyny tahaktsa! Ahabo mozumunaha zeka
ikiahatsa tihi:

— Pany pakutynaha. Mytuk tyzadisahanaha.
Kawahoro eze tu ahawanu tsihahañnaha —
tsimaha.

*Kytsa sizubarētsa mysipokzitsikinaha.
Mysukyrytsitsa humo kino niwatihi tysipokzit-
sikinaha.*

¹⁴ Asaktsa pahasukyrikiknahaze sitsyhyryze
batu Deus bo:

— O Deus myzo tysitsapusarekta — iwa batu
zikaha. Ikiahatsa tihi:

— O myzo asahi nimysukyrykynahatsa tu ty-
sisapywyky — tsimaha. ¹⁵ Kytsa sakurētsa tuk
zeka ikiahatsa kino ahakurētsa tsimoziknaha!
Siakubyitsa tuk mykaranaha zeka ikiahatsa kino

batu ahaku. ¹⁶ Kytsa sizubarētsa tsysipokzitsikinahaktsa! Tyhapepokzitsikinahaktsa! Sinamybyitsa kino ahaharereziuwytša moziknaha. Batu tyso:

— Katsaktsa myhyrinymyrētsa — iwa batu abazubatsa tsimaha.

¹⁷ Asahi simysapybyitsa tu ahabo nikaranaha zeka batu isty tsapusare. Hawa kytsa okzeka wasani tsimykaranaha. Iwaze kytsa ahasoho ty batu tyso:

— O asaktsa batu simysapy maha — iwa batu zikaha. ¹⁸ Aha humo batu ihokdaha byizeka kytsa tuk yhȳ tsimaha, batu ahamyiki. Tshamykpyriziurētsa. ¹⁹ Batu aty tohi ba ziktatsapusare. Kytsa imysapybara ty mykaranaha Deus zuba tsihyrinymyrēta, atahi sinini ykarawy bo mysipeha. Deus harere papeu humo ziwatahaka:

— Utakta kytsa bo asaktsa kytsa nisisapybyrikinaha,
mysitsapusare, simysapybyitsa nikaranaha
humo mysininiwy sihuak waha humo
mysisininiwyky — niy.

²⁰ Usta Deus harere papeu humo ziwatahaka:

— Asukyrytsitsa saraparētsa zeka, adisahawy ty sibo nyny tsimy.

Sarapurukrētsa zeka pihik ty sibo nyny tsimy.

Iwa tsimy zeka sisikpybyrētsa moziknaha — niy.

Iwa Deus harere papeu humo ziwatahaka.

²¹ Iwaze simysapybyikitsa ahape maha zeka:

— Katsa mywatu tahaktsa! — maha. Ikiahatsa ispe tsimaha:

— Batu hỹ — tsimaha. Ahatsapusarebyitsa tu kytsa tysisapywykynahaktsa. Iwa tsimyzurukunahaktsa kytsa!

13

Mybarawy ezeaktsa ahapehatsa harere bo yhỹ tahaktsa.

¹ Kyze mybarawy ezeaktsa ahapehatsitsa sitsumuẽhĩtsa kino niwatihi siharere bo yhỹ tahaktsa! Ahapehatsitsa pahapehanaha Deus harere humo zuba — ikiahatsa tysipehanaha — my iwatsahi pahapehakanaha. Iwa Deus mykara.

² Iwaze aty zeka ipehatsa tsumuẽhĩtsa harere bo yhỹ ahabyizeka atakta Deus harere bo kino niwatihi yhỹ ahabyizeka iwatahi sinini mykara.

³ Asaktsa wasani mykaranaha tahapehatsa humo batu sipyby. Asahi batu sopyksapy mykaranaha zeka tahapehatsa pokso sipybyrẽtsa. Ahapybybyi zeka mypehatsa tysisapywykynahaktsa kytsa! Iwa tsimykaranaha zeka asahi:

— O ikiahatsa wasani tsimaha — maha.

⁴ Ahapehatsa tsumuẽhĩtsa ahahumo simypokzitsiukrẽtsa moziknaha. Siharere bo yhỹ ahabyizeka ahamysapybyitsa ty zuba tsimykaranaha. Deus pahamyitsapyriwyky siharere humo, asaktsa sitsumuẽhĩtsa babatsa maha iwatsahi mysapybyitsa tu tsimykaranaha zeka ahapehatsa pokso ahapybyrẽtsa tsimoziknaha ana kino wasani my. ⁵ Iwatsahi apehatsa tsumuẽhĩtsa siharere bo hyỹ tahaktsa! Siharere bo yhỹ ahabyizeka sipokso tsahapybyrẽtsa, sinini tsimaha humo

tsahapybyrëtsa. Siharere bo hyÿ ahabyizeka iwaze sinini tsimykaranaha Deus okzeka wasani my, iwatsahi ikiahatsa siharere bo hyÿ tsimaha.

⁶ Ana humo hi ahaokyrysaro ty tsapukte bo apehatsa bykytsa bo nyny taha. Tarabaja mykaranaha zeka Deus harere humo sihyriziktsokzawy mykaranaha. ⁷ Amy ty sa ihuak ty sibo nyny tsimaha zeka anaty kino sibo nynyzo tsimaha. Apehatsa tsumuëhÿtsitsa harere bo tsiwabytoktonahaktsa! Siharere bo yhÿ tahaktsa!

Tyharape pokzitsikinahaktsa.

⁸ Batu aty tohi bo ihuak ty ibo nynyzo zikaha. Ahahuak humo tsipykbanaha! Tyhapepokzitsik-inaha zubaktsa! Ana kino tsimaha zeka myhuak watsa kytsa bo botu nyny tsikaha. Utsa kytsa bo tsipisapywyikiknaha zeka iwaze Moises sopy-kwy bo tsizubarëna tsimykaranaha. ⁹ Deus harere isopyk tihi:

— Mektsa okeza ba ziksipyriryknaha. Ba zibezenaha. Usta namy ty hyryk hyryk byitaha. Harape namy bo ka iktsa zubataha — niy. Iwaze ipehawy tihi:

— Aotutsa pauktsitsa humo tynasipokzitsikina-haktsa ahumo tsinakara nahawa tihi tysipokzit-siki — niy. Ana humo kino yhÿ tsimaha zeka taparaktsa harere niwatihi yhÿ tsimykaranaha. ¹⁰ Aty zeka ipytowybara ty pauktsitsa mysisapy-wyky zeka ba zimy. Iwatsahi ahamyibyitsa tu zeka Deus harere bo hyÿ tsimykaranaha hÿ.

Wasani tsimyzurukunahaktsa kytsa!

¹¹ Iwaze kapehawy ty hawa tsimyzurukunaha wa tynakaranahaktsa kytsa! Sesus myziksizo. Ikiahatsa Sesus harere bo hyŷ tsimykaranaha zeka hanawa puruze taperyky. Iwatsahi ahaōtutsabyihu ja. Sesus taperyky! ¹² Hanawa puruze Sesus Kiristu myziksizoze nakyoksohoze kywa. Iwatsahi mysapybara tsikykaranaha mytamoewybaik! Asaktsa mysapybyitsa tu mykaranaha miwa zuba siakparawy. Kytsa sibo batu iktsa zikaha. Sipapatu nikaranaha. Ikiahatsa batu siwatsa tsimahaktsa! Deus mozihihikik ana ty hi tsimykaranahaktsa kytsa!

Sodadutsa sibotoarētsa iwatsahi tahasukyritsitsa weryk tu tahazozikbanaha. Siwatsa katsaktsa Kiristu zikwy mytuk mynapykyryk zeka wasani tsimoziknaha. Ba zikmyizonaha. ¹³ Iwa wasani tsimyzurukunaha zeka batu mysikpyby. Kytsa watsa asahi okoroze mynakurunaha iwaze kytsa sizubarētsa sibo iktsa maha. Siopuwy tsōsī ty ka tsō tsō byitaha. Tsipikukunaha zeka tsimyharape sapybyikinaha siopuwy tsōsī humo. Utsa okeza humo ba ziksityrykzuwynaha! Sibo hua hua byitahaktsa! Usta maku bo harape tyka wowo byitaha iwa zeka pahamyiba! Ahazokdibiyihu ja! Harape tyhudiduhudidu byijataha! ¹⁴ Katsa hawa sa tsimyzihihikiknaha ana ty hi tsimykaranaha zeka mysapybyitsa tu tsimykaranaha. Hawa tsimyzihihikiknaha ana humo kino awatutaha! Sesus Kiristu zikwy mytuk mynapykyryk iwaze imysopyksapybara humo batu hŷ tsimaha. Sodadutsa sibotoarētsa maha iwatsahi tahasukyritsitsa weryk tu tahazozikbanaha. Siwatsa Sesus Kiristu zikwy

mytuk mynapykyryk iwaze mysapybyitsa
tu tsimykaranaha batu hỹ tsimaha ihumo
tahamoewy. Iwatsahi katsa hi:

— O Kiristu azikwy mytuk mynapykyryk! —
tsimaha. Iwa hỹ.

14

Atukytsa ba zikarapepeha.

¹ Iwaze kytsa Sesus harere bo hyỹ mykaranaha
sihumo ahakubyrisoroku ja tsimaha. Asahi:

— Hawa skaraba Deus okzeka wasani my. Kat-
saktsa tsikaeni zuba myhyrinymyry — maha. Si-
humo ahakubyrisoroku ja! Ba zikarapepehanaha
iwatsatu meky watu mytsaty mykaranaha. Mysit-
sumuẽhĩnaha! ² Wastuhu kytsa Sesus tuktsa:

— Katsaktsa siraratsani humo mysiborokonaha
zeka Deus okze ka wasani — mykaranaha. Utsa
Sesus tuktsa:

— Katsaktsa myzohotsa tahaborokonaha zeka
Deus okzeka batu wasani. Iwatsahi wihara
ty zuba tsinamydisahakanaha — mykaranaha.

³ Asaktsa siraratsani humo mysiborokonaha batu
tyso:

— Asahi wihara ty zuba natahadisahakanaha
batu sihyrinymyry — mykaranaha. Iwa tsimyt-
sasokonaha zeka tsisisapybyrikinaha. Siwatsa
asaktsa wihara ty zuba tahadisahakanaha batu
tyso:

— O asahi siraratsani humo piboronahaze
simysapybyitsa tu mynakaranaha —
mykaranaha. Iwa tsimytasokoronaha
zeka tsisisapybyrikinaha. ⁴ Aty ipehatsa
tsipisapybyiki zeka batu wasani my, ipehatsa

zuba isoho pisapybyiki. Katsa Sesus tuktsa Deus mypehakatsa. Atakta Sesus tuktsa mypehakatsa Deus harere humo zuba hyĩ mynakara. Hawa mykara Deus ipe:

— O nawa tsimykara wasani — my. Ata hi zuba awatu mynakara. Imysapybyita tu mykaraze Deus ipe:

— O nawa tsimykara batu amysapy — my. Mypehakatsa zikwy ituk mynapykyryk nawa wasani mozuruku hỹ.

⁵ Aty:

— Nawa puruze tabyryky Deus okzeka tisapyrẽna iwatahi ba amy tohi humo zikaha — my. Usta batu:

— Pibytuhukutu atsatu maha iwatahi kahyrikosokzawy humo mykara — mykaranaha. Estuba estuba zuba tahapetu sisopyk:

— Hawa ha ty mozuruku zeka wasani — mykaranaha. Deus okzeka kytsa meky watu mytsaty mykaranaha zeka wasani my. ⁶ Aty zeka:

— Nawa puruze tabyryky iwatahi ba amy tohi humo zikaha iwa Deus pokzi mynakara. Aty tazoho piboro zeka:

“O Deus myzo kakurẽta, ikiakta kazoho ty kabo nyny tsiky” — my iwa Deus bo mynapamykyso. Aty wihara ty tadisaha zeka:

— O Deus myzo kakurẽta, ikiakta kadisahawy ty kabo nyny tsiky my — iwa Deus bo mynapamykyso. ⁷ Batu aty tohi tabo zuba mynakara. Myokzetuze hawa tsimyzurukunaha zeka Deus mynamysukparaka. Tsimyhyrikosokdanahaze Deus mynamysukparaka iwatsahi mywahi Deus tyryktsa tsimoziknaha. ⁸ Iwatsahi myokze tuze

Deus mypehakatsa harere bo yh̄y tsimykaranaha. Tsimyhyrikosokdanaha zeka Deus tuk tsimynapykyryknaha. Iwatsahi katsakta mywahi Deus tyryktsa tsimaha. ⁹ Kiristu mypehakatsa anahumo hi nihyrikosokda. Iwaze zuba Deus zihyrizikpowy ispitu niyzikzo. Abaka mypehakatsa niyzik, Kiristu tuktsa botu nihyrizikosokdanaha atahi sipehatsa niyzik. Katsa kino niwatihi iharere bo hȳy tsimykaranaha atahi mypehakatsa. Myzubarētsa mypehatsa niyzik.

¹⁰ Ikiahatsa ja. Wastuhu kytsa ahatuk ahatukytsa tsimysisapybyikinaha. Batu imysapy tsimaha. Utsa ahatuk ahatukytsa tsimysisapybyikinahaze ispe maha:

— Ikiahatsa batu wasani tsimaha — tsimykaranaha. Ikiahatsa mytsatziutahaktsa amy wa taba parakbaha Deus okze tsinamykahabanahazo iwaze myhuak ty mybo nyny my, hawa haty tsikzurukunaha mybo ihuak ty nyny my. ¹¹ Deus harere papeu humo botu iwatahaha:

— Mybarawy ezektsa na watsa tu kaokeryk tahaekaratsa humo puruk puruk maha, (kahumo iktsazuba mykaranaha humo puruk puruk maha).

Mywatu: “Ikia zuba Deus babata” maha.

Sizubarētsa mybarawy ezektsa iwa mykaranaha — niy.

¹² Mywatu Deus bo tsimaha. Hawa mybarawy eze zikzurukunaha ana hi Deus bo tsimysasonaha, iwaze myhuak ty mybo nyny my.

Atukytsa soho ba zisapybyrinaha.

¹³ Iwatsahi mytukytsa ba zik soho metunaha! Mytukytsa okzeka wasani tsimyzurukunahaktsa kytsa! Mypetu mysopyk:

— “Hawa hasa mytukytsa pimysapybyikinaha iwaze asahi batu hỹ zikaha” tysitsumuẽhĩ — tsimaha. ¹⁴ Hawa Sesus mytsaty mykara uta kino niwatihi mytsaty mykara. Disahawy tsizubarẽna kabo ty wasani ana humo kahyrinymyrẽta. Ust-saktsa hi:

— O ana disahawy kahumo batu wasani — mykaranaha. Iwaze asaktsa ana disahawy ty tahadisahakaranaha zeka sihumo ka batu sapy. Iwatsahi pimysapybyikinaha.

¹⁵ Ikiahatsa ahazoho tsipiborokonaha zeka ahatukytsa bo batu sapy my, iwa zeka ahahumo batu siaku. Ahazoho tsipiborokonahaze ahatukytsa ana bo hi iktsa maha zeka ahahumo tahasapybyikinaha. Iwa tsimyzurukunaha zeka ahatukytsa ba ziksipokzitsi. Ahazoho humo zuba ahatukytsa tsiksisapybyikinaha. Kiristu sisapyzekenihyrikosokda ikiahatsa humo hi Deus tuk ba zik kapykyryk naha.

¹⁶ Iwatsahi ahaokze ka tisapyrẽna ana kino ustsaktsa kytsa pisapybyikinaha. Sibobatu imysapy my zeka batu tyso — O mahani, ana ty hi wasani — iwa batu tyso. Nawa tisapyrẽna pisapybyikinaha.

¹⁷ Katsaktsa Deus tyryktsa tsimaha. Amy ty sa hauk tsimykaranaha, amy ty sa tsipikukunaha nawa humo hi Deus tyryktsa batu zikyziknaha. Batu ba. Deus hyrikoso humo ityryktsa tsimoziknaha. Ata humo hi Deus harere bo hỹ tsimykaranaha. Ata humo hi mytukytsa ba zikmybetsaknaha tsiyzikwykynahaktsa. Ihumo

mykurētsa hỹ. ¹⁸ Iwa tsimyzurukunaha zeka Deus myhumo tsakurēta mozik. Utsa kytsa kino:

— Deus situk mynapykyryk iwatsahi ityryktsa moziknaha wasani mykaranaha — maha.

¹⁹ Iwatsahi tyharape pokzitsikinahaktsa kytsa! Kytsa tysipunihikwykynahaktsa tsimaha. Iwaze usts a kytsa ahahumo Sesus harere bo hỹ mykaranaha.

²⁰⁻²¹ Ikiahatsa siraratsani natahaborokonaha. Ahabo tisapyrēna. Utsa Sesus tuktsa sizoho meky watu zeka batu hauk zikaha, sihumo ka batu isapy maha, iwaze ikiahatsa kino niwatihi situkze ahazoho ty batu hauk tsimaha. Ahazoho ty siokze hauk tsimaha zeka ahatukytsa ahahumo Sesus harere bo batu hỹ mykaranaha. Iwatsahi ahazoho ty hauk hauk ahabyitaha! Duabohotsa tsik siokze tsō tsō byitaha! Iwa tsimaha ty zeka ahatukytsa tsimysisapybyrikinaha batu zikaha! Iwa ahatukytsa tysipokzitsiki. Sihumo imysapybara ty ka hauk hauk ahabyitaha! Iwaze ahatukytsa ba zisimiywy.

²² Ahaokze ka sizoho ty sasabyitsa kino niwatihi wasani my. Deus bo zuba ana soho ty tsimytsasokonaha. Utsa kytsa bo ba ziktsasonaha. Asaktsa batu paikpa mytsaty zikaha iwatsahi sakurētsa mopykyryknaha. Asahi amy ty tisapyrēna mykaranahaze batu tyso:

— Ana kino tisapyrēna yhỹja — iwa batu tyso. Iwaze asaktsa sakurētsa hỹ. Hawa batu isapy mytsaty mykaranaha zeka awatutaha. ²³ Aty zeka izoho ty sasabyitsani kino niwatihi piboro zeka:

— Ana ha azoho ty Deus okzeka tisapyrēna ja. Yhỹja — my. Deus isoho:

— Hawa tsimykara batu isapy — my. Si-hyrinymyrybyitsa tu hauk maha zeka iwaze sibo batu isapy my. Hawa tsimykaranaha ana soho ty:

— Hawa tsimykaranaha wasani my ana humo hi myhyrinymyrëtsa — tsimaha. Iwaze wasani my. Katsaktsa hi hawa tsimykaranaha ana soho ty:

— Hawa tsimykaranaha wasani ja. Yhỹ ja — tsimaha. Iwaze Deus okzeka imysopykbara ty tsimykaranaha.

15

Utsa bo tysiakuwyky.

¹ Katsaktsa Sesus harere bo hyỹ tsimykaranaha hỹ mytukytsa Sesus tuktsa bo tysiakuwykynaha. Ahakubyrisorokuja! Mytukytsa asa hi:

— Amy skaraba Deus okzeka wasani my. Katsaktsa batu myhyrinymyry — mykaranaha. Asaktsa tsikaeni zuba Sesus harere bo hyỹ mykaranaha. Iwaze katsaktsa mybo zuba batu mytsaty zikaha, sibo hi mytsatytahaktsa! ² Mytuktsa pauksitsa Sesus tuktsa tysiakuwykynaha! Tysisapywykynaha iwaze Sesus harere bo hyỹ maha.

³ Kiristu soho bo mytsaty tsimahaktsa! Ihumo zuba batu mytsaty ziknakara ustsaktsa kytsa bo zuba mytsaty ziknakara hỹ. Iwatsahi ikiahatsa iwata niwatihiktsa kytsa! Deus harere papeu humo ziwatahaka:

— Asaktsa ziksapybyikinaha anahi Deus bete zizozoko naha — niy. Iwa ziwatahaka Sesus soho niy.

⁴ Deus harere papeu humo mytsyhyryze ziwataha. Ana ty hi mymyhyrinymyryky, ana humo tsipinymyrynahaze mykubyrisorokrëtsa tsimoziknaha. Tsipinymyrynahaze ihumo mypunihikrëtsa tsimoziknaha. Iwatsahi isapyrënikia ty taperyky, Deus papeu humo mymykuwyky. ⁵ Deus bo ahatsyhyryze mopamykysoikik ipe mykara:

— O myzo ikia zuba tsimymypunihikwyky, ikia zuba tsimymozikwyky, ana kino Homa ezeiksa bo nyny tsimy. Hawa mozikiknaha zeka estuba zuba wata moziknaha, ikia humo mysitsumuëhîkî iwa tsimy. Nizihikiknahatsa hi Sesus Kiristu wata maha. Hawa Sesus Kiristu zikzuruku asa kino niwatihi iwata mozurukunaha — iwa Deus bo ahatsyhyryze mopamykysoko. ⁶ Iwaze ikiahatsa ahazubarëtsa Deus bo tsimysakibazikiknaha:

— O Deus myzo ikia zuba mypehakatsa. Ikia zuba amysapyrënikita — tsimykaranaha. Iwaze Deus Sesus Kiristuzo bo tsimysakibazikiknaha.

Deus wasaniha Sudeutsabyitsa bo motsaso.

⁷ Iwatsahi tyharapehapokzitsikinahaktsa kytsa! Hawa Kiristu ahahumo tsimypokzitsiarëta ikiahatsa atsatu harape bo tsimykaranahaktsa! Kyze kytsa tihi:

— O Deus tsimysapyrëta ihyrytsa bo iktsa tsimaha. Hawa ihumo zuba myharape pokz-itsikinaha, iwatahi Deus tsimysapyrëta hÿ — mykaranaha. ⁸ Kiristu mybarawy bo inasik. Sudeutsa Deus bo mysioktyhyrykta anahumo hi inasik. Izumuze nisihyrinymyryky hawa ha ty Deus botu nitsasoko nisihyrinymyryky atsatu mykara. Taparaktsa mydiritsa hawa ha ty Deus

sibo botu nitsasoko atsatu Sesus nikara, izumuze Sudeutsa Deus bo mysioktyhyryk. ⁹ Mybarawy bo inasikze Sudeutsa mysioktyhyrykta Deus bo my, Sudeutsabyitsa kino niwatihi Deus bo mysioktyhyryk. Asa hi:

— O Deus ikia tsamysapyrêta myhumo kino niwatihi tsamypokzitsiarêta, Sudeutsabyitsa tsimaha — mykaranaha. Tapara Deus harere papeu humo ziwatahaka:

— Iwatahi utakta Sudeutsabyitsa situkze Deus pe
“Ikia zuba wasani tsimy. Ikia zuba amys-
apyrênikita my”

Sudeutsabyitsa ana hi piwabykynaha, abo ik-
sakibazikikze ana hi piwabykynaha — niy.

¹⁰ Usa papeu humo:

— O Sudeutsabyitsa ikiahatsa Deus watawyhytsa
Sudeutsa tuk ahakurêtsaktsa! — niy.

¹¹ Usa papeu humo:

— O Sudeutsabyitsa sizubarêtsa Deus bo tsimysak-
ibazikiknahaktsa!

Mybarawy ezektsa nanabyitaba sizubarêtsa
kino niwathiktsa! “O ikia zuba wasania ty
zuba tsimykara.” tsimahaktsa — niy.

¹² Deus sohokotsa Isaijas usa papeu humo zi-
watahaka:

— Taparakta mydiri Sese estuba tsekoka

Sudeutsabyitsa pehakatsa mozik.

Deus bo mysioktyhyryk, isapyrênikia

humo piperykynaha hỹ — niy.

Sese tsekoka Kiristu my.

¹³ Iwatahi Deus ahatsyhyryze ipe my:

— O Deus myzo ikia hi isapyrênikia ty taperyky
atuk mywahi mynapykyryknaha ana kino

taperyky. Ikia tysiakuwyky hỹ batu paikpa mytsaty zikaha. Aharere bo hyỹ mykaranaha iwatsahi ahumo sispirikporẽtsa moziknaha ahyrikoso humo mospirikpotohinaha, azikwy humo sispirikporẽtsa hỹ — my. Iwa Deus bo mopamykyso.

Pauro Homa ezektsa bo mypubara ty motsasoko.

¹⁴O katukytsa utakta ahasoho humo inymyryba ahamysapyrẽtsa hỹ. Ahahyrikporẽtsa ana humo hi kahyrinymyrẽta. Tyhapehyrinymyrykynaha.
¹⁵Iwatatuze papeu humo ahabo piwatahaka wasania ty piwatahakazo batu kasikpyby ana humo ahaspiriktsokdabyihu ja. Deus harere motsasoziuku iwaze anasoho bo hi mytsaty tsimykaranaha. Iwa my Sesus Kiristu humo atahi kahyritsokzawy humo zikpeha.

¹⁶Utakta Sesus Kiristu tsumuẽhĩtsa, ana bo hi zikwatawy. Uta Sudeutsabyitsa bo zikwatawy. Deus harere wasania ty sibo motsasoko ana humo hi zikwatawy. Utakta Deus wahoro zubata eze ziknapamykysokota wata asa humo ka Deus tsakurẽta. Hawa Deus nizihikik ziknakaranaha ana humo hi Deus tsakurẽta. Iwatatu Deus wasania ty Sudeutsabyitsa bo motsasoko, kyze Sudeutsabyitsa Sesus harere bo hyỹ mykaranahaze Deus ana humo hi tsakurẽta hỹ. Asaktsa meky watu moziknaha, Deus hyrikoso humo simysapyrẽtsa moziknaha, Deus tyryktsa moziknaha.

¹⁷Deus tsyhyryze tarabajaziu mynakara, hawa Kiristu mozihikik naha humo zuba mynakara iwatahi kahyritsokzawy humo kakurẽta.

¹⁸ Kiristu kahumo Sudeutsabyitsa Deus harere bo hyĩ mykaranaha izikwy kahumo hi katuk mynapykyryk. Iwatsahi Sudeutsabyitsa Deus harere bo hyĩ mykaranaha. Batu kasikpyby. Hawa iktsasoko naha humo batu kasikpyby. Hawa ikykara ana humo hi batu kasikpyby iwatahi Sudeutsabyitsa Deus harere bo hyĩ mynakaranaha. Hawa skaraba Kiristu mozhikik ana humo hi yhy mynakara iwaze Sudeutsabyitsa Sesus harere bo hyĩ mynakaranaha hy.

¹⁹ Deus zikwy katuk mynapykyryk, ihyrikoso humo amy ty kytsa batu zikaha utakta ikykara. Deus hyrikoso katuk mynapykyryk iwatahi kytsa iksizororowy. Iwatsahi kytsa kabo iktsaziu nikaranaha iksi humo kyokbaik. Iwatawytsa humo Deus wasania ty bo yhy mykaranaha. Nanabyitaba Deus wasania ty Sesus soho iktsasoko, taparaka Serusarēhe eze iktsasoko, iwaze ikparakzo nokponi ikukuru. Iriria bo ikzumu. ²⁰ Utakta Deus wasania ty motsaso tsihikik asa hi Sesus soho batu siwabyhy. Asaktsa isoho batu siwabyhy ihumo sispirikpobyitsa sibo hi Deus wasania ty iktsasoko. ²¹ Hawa Deus harere papeu humo botu ziwatahaka anawa ha ikykara papeu humo:

— Asaktsa Deus zipehata soho batu siwabyhy isoho piwabykynaha.

Deus wasania ty isoho piwabyziukunaha — niy.

Pauro Homa bo mynakozore tsihikik.

²² Kyze utakta ahabo mynakozore tsihikik batu zik. Deus wasania ty siwabyhybyitsa bo motsasoko iwatahi ahabo batu pão. ²³ Abaka hyrizikt-sokzawy nabytykara eziky nepykbaik. Iwa niytyk tseheze tsizubarêna ahabo mynakozore tsihikik.

²⁴ Ahabo moparakze ahatuk pyryspykare my mokozore. Espanija bo moparakze ahaburuk my. Iwaze Espanija bo moparakze ikiahatsa hi tsipiktsumuêhĩnaha. ²⁵⁻²⁶ Abaka Serusarêhe bo mokuru. Masedonia ezektsa, Akaija ezektsa ahatsa niwatihi siokyrysaro waka ziperykynaha. Ana okyrysaro ty Serusarêhe ezektsa Sesus tuktsa sinamybyitsa bo pinyny tsihikiknaha. Iwatahi ana okyrysaro waka sitsyhyryze wabehyryk my sinamybyitsa bo nyny my. ²⁷ Asaktsa Masedonia ezektsa, Akaija ezektsa ahatsa niwatihi Sudeutsabyitsa maha. Sesus harere bo hyÿ mykaranaha iwatsahi ihumo sispirikporêtsa. Sudeutsa hi Deus wasania ty sibo nitsasokonaha anahumo hi batu sispiriktsokda. Iwatsahi siokyrysaro ty ziperykynaha ana ty hi Sudeutsa sinamybyitsa bo nyny maha iwa mozihihikiknaha. Sudeutsabyitsa Sudeutsa mysitsumuêhĩnahaze wasani my iwa sinamybyitsa bo mysitsumuêhĩnaha. Sesus humo situkytsa moziknaha.

²⁸ Anahyrikosokzawy nepykze, ana okyrysaro ty tsizubarêna sinamybyitsa bo nyny my, iwaze Espanija bo moparakze ahaburuk mynakozore. ²⁹ Ahabo pomoze hawa Kiristu pahasapywy tsihikik ahatuk motsasoko. Kabo piksapywyky ahabo niwatihi pahasapywyky. Kaharere isoho humo ahakurêtsa tsimoziknaha.

³⁰ O katukytsa katsaktsa Sesus harere bo hyŷ tsimykaranaha iwatsahi ihumo myspirikporētsa, Deus hyrikoso humo tsimyharape pokzitsikinaha iwatsahi katsyhyryze Deus bo typamykysonahaktsa kytša! Iwa mozihihikik hŷ. Ipe tsimaha:

— O myzo ikia Pauro tsitsumuēhīkta! Ahumo tsipunihikrēta mozik. Mokuruze typokzitsikta.

³¹ Asaktsa Sudeutsa aharere bo batu hŷ maha, Pauro ty ka beze beze byitaha, ity ykni ykni byijataha. Ikia Pauro tsipokzitsikta! Serusarēhe ezektsa Sesus tuktsa tysitsumuēhīktsa! Sudeutsabyitsa siokyrysaro piaksekenaha, ana humo kino amytsatyhy byihuja ahumo sakurētsa moziknaha — tsimaha iwa Deus bo katsyhyryze tsimypamykysokonaha.

³² Ana humo kino tsimykaranaha zeka kakurēta mozik. Iwaze Deus mozihihikik zeka ahabo mynakozore. Kakurēta hŷ. Ikiahatsa tsipikykykynaha niwatihi ana humo hi kahyrinymyrēta.

³³ Deus bo ahatsyhyryze mopamykysoko:

— O Deus myzo Homa ezektsa tysipokzitsikta! Batu paikpa mytsaty mykaranaha ahumo sakurētsa moziknaha — my. Iwa hŷ.

16

Sizubarētsa humo kahyrizikbarēta.

¹ Kyze Pebe inarokotatsa myzawy pe:

— Ikia tsamysapyrētatsa — my. Atatsa Sesus tuktsa izumubanahaze Deus harere piwabykynaha mysitsumuēhīkī. Asaktsa Kēkereja ezektsa mysitsumuēhīkī. ² Ahabo mozumuze ikiahatsa hi:

— O myzawy pany pakutyny. Mytuk tsikadis-aha mywahoro eze tsikuru — tsimaha. Iwa Sesus tuktsa sizubarëtsa tynahapepokzitsikina-haktsa. Atatsa kino sizubarëtsa nisitsumuëhîkî atatsa ziktsumuëhîkî. Iwatsahi hawa itsyhyryze tsimaha ana ty kino tsimahaktsa!

³ Kytsa sizubarëtsa Homa ezektsa sihumo kahyrizikbarëta Pirisira, Akuiro ibarikta kino niwatihi sihumo kahyrizikbarëta. Asahi katuk Sesus Kiristu tsyhyryze tarabajaziu ziknakaranaha. ⁴ Kapokzitsiwytu asiba tahabawynaha. Sisoho motsasoko:

— Tsahamysapyrëtsa — mynakara. Iwa ustsä kytsa Sudeutsabyitsa mykaranaha. Sesus tuktsa nanabyitaba atsatu motsasokonaha. Asaktsa izumubanhaze Deus harere piwaby tsihikiknaha. ⁵ Sesus tuktsa niwatihi siwahoro bo izumubanhaze sihumo kahyrizikbarëta.

Epeneto inarokota kaharereziuwyy humo kahyrizikbarëta. Atakta taparakta Sesus harere bo hyÿ nikara Asia ezekta my.

⁶ Maria humo kahyrizikbarëta niwatihi. Atatsa ahatuk Deus pokzi tarabaja ziknakara.

⁷ Katukytsa Æderoniko, Sunias ahatsa niwatihi sihumo kahyrizikbarëta. Katuk sakyriukrënikitsa hurukwy eze niapykyryknaha. Asaktsa Deus nisipeha Deus harere nitsasokoronaha ana humo kino siakzohotsa sihyrinymyrëtsa. Utakta batu Sesus tukta tuze ihumo batu kaspirikpobyize asaktsa botu Sesus tuktsa niaha.

⁸ Äpiriato humo kahyrizikbarëta. Atakta kaharereziuwyy hyÿ ata kino Sesus harere bo hyÿ ziknakara niwatihi.

⁹ Urubano humo kahyrizikbarêta atahi katuk Sesus soho nitsasoko. Estakis kino niwatihi kaharereziuwu humo kahyrizikbarêta.

¹⁰ Aperes humo kahyrizikbarêta atakta tsakubyrisorokrêta tu Kiristu tuk mynapykyryk. Aristoburo wahoro ezeiksa kino niwatihi sihumo kahyrizikbarêta.

¹¹ Katuky humo Erodião humo kahyrizikbarêta. Naresiso wahoro ezeiksa humo niwatihi asaksa Sesus tukta sihumo kahyrizikbarêta.

¹² Myzawy Tiripaena, Tiriposa kino niwatihi asiza Sesus Kiristu tsyhyryze tarabaja ziknakaranaha asiza humo kahyrizikbarêta. Myzawy Periside kaharereziuwu atatsa humo kamypokzitsiarêta atatsa humo kahyrizikbarêta, atatsa hi Sesus tsyhyryze tarabaja ziknakara.

¹³ Hupo atahi Kiristu ziwatawu ihumo tsipuni-hikrêta hỹ. Ije humo niwatihi, sihumo kahyrizikbarêta. Atatsahi ziksapywyky itse wata ikyzik kasopyk.

¹⁴ Asĩkirito, Perekôte, Eremes, Patorobas, Eremes, iwatsa mytukytsa situk niwatihi sizubarêtsa humo kahyrizikbarêta.

¹⁵ Piroroko, Suria, Nereu izawy Orĩpas iwatsa Kiristu tyrykta situk sizubarêtsa humo kahyrizikbarêta.

¹⁶ Kytsa ahahumo ahamypokzitsiukrêtsa tsimymywatawynaha iwatsahi tuharapehapyryknahaktsa. Sizubarêtsa Sesus tukta nanabyitaba asahi mozumubanaha Deus harere piwabykynaha, asaksa ahahumo sihyrizikbarêtsa hỹ.

Asiba nepyk kapehawu bo wabytoktotahaktsa.

¹⁷ Iwaze katukytsa kapehawy bo tsiwabytok-tonahaktsa! Asaktsa myharape sakbyrikinahatsa ihumo ahasopykziuhu! Hawa botu tsinymyrynaha anahi pimyí tsihikiknaha. Pahaknikinaha. Sibara botu tahaktsa! ¹⁸ Asaktsa hawa Kiristu mozihihikik batu hỹ zikaha. Taha bo zuba sisopyk. Asahi:

— Myharere baba. Hawa wasani ana tihi tsimykaranaha — iwa mybarapetu mykaranaha. Kytsa sispirikpobyitsa tu mysisapybyikinaha iwatsahi sihumo paikpa mytsaty mykaranaha.

¹⁹ Ikiahatsa humo kakurēta hỹ. Kytsa sizubarētsa nanabyitaba ahasoho piwabykynaha hawa Sesus Kiristu harere bo zuba hyỹ tsimykaranaha iwatsahi ihumo ahaspirikporētsa tsimoziknaha ana hi ziwabynaha. Iwatsahi isapyrēnikia ty zuba tahaktsa kytsa! Imysapybaraka tsimoewybaiknaha. ²⁰ Deus ba hawa tohi zizukninaha iwaze Satanas zikwy myzipapykik iwaze ba zahayknizo iwatsahi ikiahatsa Satanas bo ka mytsaty mytsaty byitahaktsa! Iwaze Deus bo ahatsyhyryze ikpamykysoko:

— O Deus myzo tysisapywykykta! — mykara.

²¹ Katukta Timoteo ahahumo tsihyrizikbarēta. Katuk tarabaja mynakara. Mytukytsa Rusio, Sasō, Sosipataio iwatsa ahahumo sihyrizikbarētsa.

²² Uta Terisio amy ty Pauro motsasoko anahi papeu humo piwatahaka, uta kino niwatihi ahahumo kahyrizikbarēta, katsaktsa Sesus harere bo hyỹ tsimykaranaha iwatsahi ihumo myspirikporētsa iwatahi ahahumo kahyrizikbarēta.

²³⁻²⁴ Kaijo ahahumo tsihyrizikbarêta. Uta Pauro iwahoro eze ikapykyryk. Anaeze Sesus tuktsa mozumubanaha asa kino niwatihi ahahumo sihyrizikbarêta. Erasto ahahumo tsihyrizikbarêta, Korîtio ezektsa atakta okyrysaro perykytsa. Mytsy Kuarato niwatihi ahahumo tsihyrizikbarêta.

Deus bo tsimysakibazikknahaktsa.

²⁵ O kytsa Deus bo tsimysakibazikknahaktsa! Katsaktsa:

— O Deus ikia zuba apunihikrênikita hỹ. Ikia zuba amysapyrênikita hỹ — tsimahaktsa! Atahi tisokpykziurêta hỹ. Ata humo hi mypunihikrêtsa tsimoziknaha, katsaktsa Sesus harere bo hyỹ tsimykaranaha izikwy humo tsikspirikpotohinaha. Deus wasania ty hawa Sesus kytsa Deus bo mysioktyhyryk motsasoikik. Kytsa sizubarêtsa bo ana harere nitsasoko. Tubabatu anaharere mybarawy ezektsa bo tsihokdaharêna. Abaka batu ihokdaha.

²⁶ Deus harere mybarawy ezektsa sizubarêtsa bo motsasoko, kytsa mysipeha wasania ty motsasokonaha iwaze asa kino niwatihi Deus harere bo hyỹ mykaranaha, iwatsahi ihumo sispirikporêtsa moziknaha. Deus koikny baktatu isohowy humo iwa iharere papeu humo tapara tu ziwatahakanaha aba kino atsatu mykara.

²⁷ Iwatsahi Deus bo tsimysakibazikknahaktsa kytsa!

— O Deus myzo ikia tsahyrinymyrêta babata ahyrinymyrywy wasani hỹ ikia zuba asopykziurêta hỹ iwatsahi aharere bo hyỹ tsimaha. Ikia hi Sesus Kiristu katsa mybo tsikzipaha iwatahi inasik iwatsahi atuk mywahi

tsimynapykyryknaha. Ikia humo zuba mykurětsa
tsimynapykyryknaha — tsimaha.

Iwa tsimysasonahaktsa kytsa hỹ. Niwazuba.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1